

續文獻通考

卷六三——六七

7保  
5266  
70-18



門 7 保  
統 5266  
卷 70-18

續文獻通考卷之六十三

皇明進士雲間王圻纂輯

節義考 忠臣二

後梁

王彥章字子明鄆州壽昌人末帝時爲鄆州防禦使與唐將夏魯奇戰馬蹶被執莊宗愛其驍勇欲全活之彥章曰朝事梁暮事晉何面目見天下人乎終不從遂見殺張源德梁末守貝州時郡邑皆歸晉獨貝州堅守或勸出降不從遂被害

後唐

姚洪以指揮使戩閬州梁將董璋破閬州執洪不屈燃鑊

續文獻通考

卷之六十三

一三、四十四 京

于前令壯士剖其肉而食洪至死罵不絕口明宗聞之  
泣下錄其二子

夏魯奇字邦傑唐莊宗賜姓名曰李紹奇常解莊宗重圍  
又擒王彥章官河陽節度使徙忠武後董璋攻遂州魯  
奇閉城拒之旬月救兵不至城中食盡自刎死

張敬達爲唐將契丹兵圍之楊光遠勸敬達降敬達不忍  
背唐謂曰何不殺我降光遠卽斬敬達降契丹後耶律  
德光哀其忠遣人收葬

裴約唐澤州刺史時李繼韜以潞州留後叛降唐來攻澤  
州約泣以諭衆曰吾死不從也嬰城自守城陷死之唐  
主憫其忠爲立祠

後晉 沈斌祁州刺史時趙延壽引契丹兵攻祁州斌在  
城上延壽語之曰使君何不早降斌曰侍中父子失計  
陷身虜庭忍帥犬羊以殘父母之邦不自媿耻更有驕  
色何哉明日城陷斌自殺

後周 韓通爲周侍衛親軍副都指揮使恭帝元年遣宋  
祖帥師禦漢至陳橋爲諸軍推戴通謀率衆禦之軍校  
王彥昇逐焉通馳入其第未及闔門爲彥昇所害妻子  
俱死後宋祖贈通中書令以禮收葬

後蜀 高彥儔爲江寧制置使太祖乾德二年曹彬帥師  
至夔蜀彥儔拒之力戰不勝奔歸府第整衣冠望西北  
再拜縱火自焚死光義得其骨於灰燼中以禮葬之

南唐

劉仁贍為壽州節度使堅守不下世宗遣使招降其子崇諫應其招仁贍立命斬之監軍周廷構以城降周仁贍遇害周以壽州為忠正軍以旌仁贍之節

李延鄒為泗州叅軍時周主自將伐唐攻濠泗州唐郭廷謂知唐不能救命延鄒草降表延鄒責以忠義廷謂以兵臨之延鄒擲筆曰大丈夫終不負國為叛臣作降表廷謂斬之

張彥能南唐楚州守將也周世宗攻之與其副鄭昭業戰死所部千餘人皆無降者

孫晟密州人仕南唐為右僕射及使周謂其副王崇質曰

吾終不負永陵一杯土世宗召問江南事不對乃收下

獄臨刑怡然南望拜曰臣惟以死報國唐主贈魯國公

鍾清為江南主勤政學士時曹彬克金陵清朝服坐于家

兵及門舉族死之

胡則為唐指揮使時曹翰攻江州不下刺史謝彥實集眾

謀納欵則謂其下曰吾屬世受李氏恩安忍負之刺史

不忠欲背國爾曹能從我乎眾皆聽命乃與同列宋德

明等攻彥實執而殺之集眾為唐固守城陷翰執之數

其拒命之罪對曰犬吠非其主公何怪也翰殺之

陳喬為唐門下侍郎開寶八年曹彬克金陵喬與張洎約

同死社稷然洎實無死志至是喬徑入白唐主曰今日

國亡願加顯戮以謝國人唐主曰此乃曆數卿死無益也喬曰縱不殺臣臣何面目對士人乎遂自經死

宋

秦傳序江寧人淳化五年以夔陝巡檢使禦李順亂城陷父子皆死太宗錄其次子煦為殿直煦死復以煦弟昉為三班奉職

康保裔為瀛州都部署真宗咸平二年契丹侵瀛州圍之數重左右請保裔易甲以遁保裔曰臨難無苟免正吾效死之日也遂決戰數十合兵盡矢絕而援不至保裔與宋順俱死之

劉紹榮為益州都巡檢使時咸平三年益州戍卒作亂紹

榮死之

裴濟為靈州知州咸平五年趙保吉集蕃部來攻靈州濟被圍餉絕刺指血染奏求救兵不至城遂陷濟死焉

景林洙通州人咸平間王均叛州有賊應之者林洙將鄉兵拒戰為賊所戕首隕而身不仆跨馬奔歸州城東北隅人訝而呼之曰公無首矣于是始墜邦人即其地立祠

劉平為鄜延路副總管仁宗景祐時元昊寇延州平帥師往援與賊大戰衆潰平被執死之贈朔方節度使兼侍中

高敏登州人慶曆中為涇源指揮使與西夏力戰而死贈

嘉州刺史錄其三子

任福開封人慶曆中元昊寇渭州不屈死節贈武勝軍節度使賜第一區給其家錢及粟麥追封母妻錄其子

耿昭化河南人仕為蜀州司戶叅軍盜據城欲脅以官昭化大罵至斷手足不屈而死

耿傳昭化子以父蔭累官通判儀州徙慶州元昊入寇叅任福行營軍事諸將失利或勸傳避之傳愈前指顧自

若被數創乃死詔贈右諫議大夫官其四子

王珪涇源都監也元昊入寇珪從任福戰好水川福陷圍中珪誓以死報國復入援福殺數十百人鞭撓掌裂奮

擊自若矢中目乃還夜卒

張憲為武畧大夫慶曆時貝州宣毅卒王則據城以叛憲

與其子琳同死之贈武功大夫官其兩子

馬遂開封人為北京指揮使王則叛賈昌朝使持榜入貝州招降既見則諭以禍福不谷遂奮起抵則拒其喉毆

之流血賊黨攢刃聚譟乃縛而支解之事聞仁宗嘆息久之贈宮苑使官其五子

董元亨深州人仁宗時以貝州通判罵王則為所害贈太常少卿錄其子三人

李英高要人為欽州推官死儂寇之難一家十有三人贈比部郎中廟食高要

宋士堯馬平人與儂寇力戰于邕州敗北賊斷其首屍不

什猶奔馬而還贈屯衛大將軍

曹覲字仲賓建安人爲建州司戶叅軍皇祐中知封州儂智高叛攻封州率徒決戰不勝被執賊戒勿殺粹使拜且誘以美官覲不肯拜且詈賊猶惜不殺徙置舟中覲兩日不食賊知其無降意害之至死詬賊不絕事聞贈太常少卿錄其四子後立廟封州

張拱廣西都監也儂賊圍邕州拱自州來援旣入而城陷不屈而死踰月得其屍如生

王正倫以太尉將兵擊儂賊戰死于難子景仁卽其地結草堂祠之朝廷嘉其節贈節度使謚曰忠顯

張日新安仁人皇祐間爲廣西邕州

新力戰不支被執不屈死之

孔宗旦魯人皇祐中以邕州司戶叅軍叱罵儂智高爲所害贈太子中允

趙師旦積之從子皇祐中以太子右贊善大夫移知康州奮罵儂賊被害贈光祿少卿賜其母長安縣太君冠帔官其子弟并從子三人

王從政爲閣門祗候與儂賊戰于太平場被執以沸湯沃之終不屈而死贈信州刺史錄其孫三人

梁仲寶賓州人儂賊犯境率衆力戰死之郡人爲立廟徐靈博白人爲宜州長史追儂賊至金城驛力戰死之贈

大理丞

郭恩開封人累官秦隴路兵馬鈐轄嘉祐中夏人入寇臥  
牛峯恩與力戰自旦至食時失利被執不屈自殺贈同  
州觀察使錄其子弟有差

張吉爲淮安鎮守烽卒神宗熙寧三年夏人寇慶州吉爲  
夏人所掠驅至城下呼令降吉反其辭賊怒害之至死  
罵不絕口事聞贈內殿崇班勇烈將軍錄其子

景思忠字進之普州安岳人神宗時以遂州駐泊都監與  
夷人力戰而死官其子及同死者之子七人

王竒汾州人神宗時以廣西都監死于蠻寇贈皇城使忠  
州防禦使官其後六人

蘇緘晉江人爲邕州知州熙寧九年交趾人圍邕緘悉力

拒守外援不至城遂陷緘殺其家三十六人因自焚死

城中人感緘之義無一人從賊者帝聞之嗟悼贈奉國  
軍節度使謚忠勇邕人爲立祠元祐間賜額懷忠子明

正孫廣淵直溫與緘同死皆蒙褒贈

高永能元豐初破夏人有功進榮州團練使元豐五年夏  
人寇永樂城陷其孫昌裔欲挾之從間道走永能嘆曰  
吾結髮與西羌戰未嘗挫今年已七十受國恩恨無以  
報此吾死所也遂戰而死詔贈房州觀察使錄其子世  
亮爲忠州刺史

張建侯政和中爲辰州守與盧陽令王憲之救鎮江寨爲  
賊黃安俊所執迫使諭寨中人出降建侯給諾至寨下



大呼曰爲人當識順逆我萬無求全汝等堅守勿二賊怒并憲之俱害之郡人立祠以祀

徐禧分寧人元豐中城永樂禧以給事中被詔與內侍李舜舉往相其事會賊趨新城禧亟從禦或曰被詔相城禦寇非職也禧不聽與舜舉俱至永樂城陷死之贈吏部尚書謚忠愍

高永年河東菴官也崇寧初知岷州爲降羌所執死之彭汝方知衢州徽宗宣和初方臘陷城汝方罵賊以死贈龍圖閣直學士謚忠毅官其家七人

鞠嗣復宣和初知休寧縣爲方臘所得不屈賊不忍加害卒生還

宋旅字庭實莆田人知剡縣不屈於方臘而死贈朝散郎  
錄其四子

詹良臣字元公睦州分水人以縉雲尉不屈于方臘被害贈通直郎官其子孫二人

丁仲修字敏之温州人方臘陷樂清將渡江巡檢陳奎往捕死之賊至仙遊夏祥遣輔褒迎戰數十合褒死之仲修乃率鄉兵禦諸樂灣力屈而死

項德武義人郡之禁卒也與方臘戰于黃姑嶺下死邑人哭聲振山谷圖其像歲時祝之

蔣煜仙居人有文學方臘欲妻以女煜辭之脅以拜亦不從寇曰吾戮汝矣煜伸頸就刃罵聲不絕而死

胡堃爲婺州教授遇方臘作亂以武奮遇害舉家死之詔  
贈奉議郎推恩二子

王行之太平人初除婺州士曹方臘黨寇婺州守臣皆遁  
去行之曰吾獄官也守吾職死分耳遂遇害事聞贈通  
直郎官其一子

毛稟字淑縝江山人以特恩爲歙士曹睦寇攻城官吏皆  
遁稟曰吾職司寇獄有繫囚義不可去乃攝州事時二  
子貢辟雍卽遣人持獄印縋城以出令獻于朝城陷稟  
坐府上賊脅使降不屈罵賊不絕口死之妻錢氏掖其  
姑弗忍去俱遇害事聞贈朝請郎官其後三人

劉士英宣和中通判太原府與將士王稟俱死于金寇

程建宣和中從楊惟中征方臘有功累遷榮州團練使時  
金人入寇詔以迪提舉永興路軍馬及永興破迪率其  
徒力戰身被創幾徧絕而復蘇猶厲聲叱戰不已遂死  
之詔贈明州觀察使謚忠愍

張堯戩字德祥侍中耆曾孫也宣和間知汾州與虜力戰  
而死一門同死者八人贈延康殿學士銀百兩絹五百  
匹紹興中謚忠確

傅察字公晦孟州濟源人宣和七年以太常少卿奉使金  
虜迴至境上幹離不脅之降不屈死之

江仲明台州人宣和間寇亂載老母逃山澗中猝遇寇逼  
使降仲明奮起罵賊死之

朱昭字彥明府谷人宣和中爲震武城兵馬監押攝知城  
事金人逼城盡殺其家人死守後中矢而死

張甲德興人爲邕州巡檢宣和時金兵犯順甲力戰死德  
祐元年詔贈忠利侯

史抗濟源人宣和末爲代州沿邊安撫副使金人圍代急  
抗夜呼二子稽古稽誓曰吾昔語用事者鴈門宜擇帥  
增戍彼皆不吾省今城必陷吾將死事汝輩亦勿以妻  
子爲念而負國也二子泣曰惟命明日城破父子三人  
突圍力戰死于城隅

李翼麟州人宣和末爲代州西路都巡檢使金人取代遣  
使諭降翼射却之後兵敗被執粘罕欲臣之怒罵不屈

而死同時不屈而死者縣令李聳丞王唐臣尉劉子英  
監酒闔城將官折可與

陸有常知臨淄縣臨朐土兵作亂有常率兵拒守死于陣  
知益都張侃千乘縣丞丁興宗亦死之

孫益以福州觀察使知朔寧府被命救太原時張孝純已  
將太原降金不肯啟門遂死之初益奏郡人孫谷爲掾  
屬至是嘆曰吾身已許國又不忍負孫公亦死之

張確守隆德府時粘沒喝入威勝軍或勸確潰圍出確斥  
曰吾守土臣頭可斷膝不可屈力戰而死

种師中洛陽人累官奉寧軍承宣使會金人內侵師中戰  
死贈少師謚莊愍

李彥仙字少巖鞏昌人爲陝州知州靖康元年金婁室攻  
陝奇彥仙才百端誘陷彥仙悉斬其使力盡城陷投河  
死贈彰武軍節度使建廟商州號忠烈官其子給宅一  
區田五頃謚忠感時裨將龍門邵雲夏縣呂員登陝縣  
宋炎與賈何閻平趙成皆死並贈官

杜翊世華陽人通判懷德軍靖康初金兵奄至城陷翊世  
先火其家與妻張同縊死贈朝議大夫官其後十人名  
所居曰忠義坊

高子儒狄道人知蘭州龕谷寨金人陷熙河子儒聞副總  
管劉惟輔戰死力瘡莫支乃先自刃其家與軍將韓清  
皆罵賊而死

黃璘字邦美浦城人登政和八年第後丞拱州靖康元年

金人襲拱州城陷虜迫郡縣吏役爲鄉導璘移病不出  
虜驅迫之遂赴井死事聞贈朝奉郎官其弟之子爲璘  
後

蔣興祖常州宜興人徽宗時知楊武縣靖康初金兵犯京  
師道過楊武或勸使避興祖曰吾世受國恩當死于是  
與妻子留不去及師至力不敵死焉年四十四詔贈朝  
散大夫

楊震字子發代州崞人靖康中知麟州守建寧砦與子居  
中執中俱死建炎二年贈武經郎長子存中貴請于朝  
謚恭毅

曾悟字蒙伯肇之孫靖康中為亳州士曹金人破城抗辭  
慢罵衆刃剜之屍體無存者妻孥同日被害

李震汴人靖康初金人迫京師震時為小校率所部三百  
人出戰殺人馬七百餘已而被執問南朝皇帝所在震  
曰我官家非爾所當問斮割垂盡猶罵不絕口

司馬朴光兄旦之孫靖康初以兵部侍郎使金握節而死  
贈兵部尚書謚忠潔

郭忠孝字立之洛陽人少以父達任補官舉進士累遷河  
東路提舉坐事靖康初為永興軍路提點刑獄及金人  
寇永興兵寡或勸忠孝以監司出巡可以避禍忠孝不  
答與經畧唐重分城而守金人陣城下忠孝募人以神

臂可射之敵不得前已而城陷忠孝死之贈大中大夫

歐陽詢字全羨廬陵人靖康中以將作監臣出使極言祖  
宗之地不可割時宰怒欲殺詢廼遣詢奉使割深州詢  
至深州城下慟哭謂城上人曰朝廷為奸臣所誤吾已  
辦一死來矣汝等宜勉為忠義報國金人怒執送燕焚  
死之詔錄其忠無子官其壻曾敏恭

姜綬麗水人以忠勇士召募剗股藏書縋下南壁將往南  
京求援為金邏騎所獲厲聲叱罵被害官其子特立承  
信郎

徐徽言西安人靖康中知晉寧軍兼嵐石路沿邊安撫使  
晉寧不守金挾徽言去不屈死之統副孫昂及士卒皆

續文獻通考卷之六十三  
不屈被害事聞贈晉州觀察使謚忠壯再贈昭化軍節  
度徽言子岡從孫適俱死事世著忠義

孫昂靖康初為太原路兵馬都監與徽言協志禦虜後引  
刀欲自刎為金人所奪擁至軍前不屈而死贈成忠郎  
團練使昂父翊宣和中知朔寧州揀太原死于陣亦世  
濟忠義云

李珙永福人官至武功大夫金虜犯闕召天下兵珙謂蔣  
炳文曰主憂臣辱主辱臣死豈可以道遠便自營私乎  
募死士三千人倍道兼行與賊戰死之贈忠州防禦使  
宋炎陝縣人蹶張命中補秉義郎金人圍城射死數百人  
比再圍以勁弩發毒矢殺千餘人城陷虜求善射者官

之炎不應六戰死

李若水字清卿曲周人靖康中為吏部侍郎帝如青城至  
金營金人逼帝易服若水抱持而哭詆金人為狗彘金  
人曳若水出擊之且令曰必使李侍郎無恙若水絕不  
食或勉之曰事無可為者今日順從明日富貴矣若水  
嘆曰天無二日若水寧有二主哉其僕亦慰解之曰公  
父母春秋高若水屈冀得一歸覲若水叱之曰吾不顧  
家矣後旬日粘沒喝召計事若水因歷數而罵之監軍  
搆破其舌血罵愈切至以刃裂頸斷舌而死金人亦  
相與言曰遼國之亡死義者十數南朝惟李侍郎一人  
呂由誠字子明誨之季子以父恩補官靖康初徙知集慶

續文獻通考 卷之六十三  
府時羣盜蜂起崎嶇至郡金兵來攻由誠與判官趙令  
佳同心誓守城陷俱被執不屈死之

龔端新昌人欽宗稱其凜凜有直臣節後奉使河東路聞  
二帝北狩憤惋而卒

程振樂平人靖康中拜刑部侍郎金人寇汴梁索金帛無  
厭振與梅執禮等四人詣金營言比屋盡空無以塞命  
虜酋怒遂遇害贈端明殿學士謚剛愍

孫鉉自眉徙居戎州爲博士二帝北狩金人以鉉有名上  
庠指名檄取之義不屈以死

王履以修武郎副李若水使金抗虜不屈與若水俱死臨  
死畧無懼色且歌詩末章云矯首問天今天卒無言忠

臣效死今死亦何愆人聞而悲之

劉韜字仲偃崇安人第進士靖康中以資政殿學士充河  
北宣撫副使太原陷召入覲爲京城四壁守禦使京城  
失守遣使金營金人欲用之歸書片紙使親信持報諸  
子卽沐浴更衣酌卮酒而縊建炎初贈資正殿大學士  
累贈太師謚曰忠顯

吳革字義夫華陽人靖康初爲閤門宣贊舍人女直立張  
邦昌爲楚帝革率衆討邦昌不克死之

吳懋晉陵人靖康末仕爲禮部員外郎金人立張邦昌王  
時雍用事坐政事堂懋發憤罵之曰反虜吾不能擊汝  
如段秀實耶時雍面頸俱赤後吳玠莫儔以表狀詣虜

營懋竟不屈

郭許德順中安堡人靖康中爲涇原副將不降金虜而死  
贈武翼大夫忠州刺史同死者西安朱友恭亦涇原副  
將贈敦武郎

王士言武舉進士靖康中畢力禦金虜死于澤州贈拱衛  
大夫忠州團練使官其後五人

祝公明處州麗水人爲太原府蓋縣主簿靖康中與金人  
力戰而死贈承事郎子陶爲唐州司戶亦死官所

陳邁知中山府爲金師所圍半年外無援師京都旣陷割  
兩河求和邁弟光祿卿適至中山臨城諭旨邁遙語曰  
主辱臣死吾兄弟平居以名義自處寧肯賣國家作囚

奴乎適泣曰兄但盡力勿以弟爲念後爲步將沙振所  
害及其子錫并僕妾十七人建炎初贈特進

李熙靖晉陵人提舉醴泉觀邦昌使直學士院固拒不食  
而卒贈延康殿學士

謝貺汝州人欽宗卽位上封事十篇論事切至金人犯汝  
州貺自襄陽領兵往援力戰而死

李涓南豐人靖康之難率兵勤王至蔡州與金人戰死之  
高宗官其二子

霍安國靖康中知懷州城陷一門無噍類高宗建炎元年  
詔諸路詢死節之臣以聞贈延康殿學士

張叔夜永豐人從淵聖北行至白溝河仰天大呼扼吭而



卒建炎紹興間塋衣冠于寶積院之西朝廷褒其節詔有司卽墓立廟賜額旌忠謚忠文

李邈字彥思清江人靖康中以青州觀察使知真定城陷金人欲其被髮左衽邈自去髮為浮屠遂遇害高宗贈昭化軍節度使謚忠壯

劉翊靖康中為真定府路都鈐轄金兵逼之解絛自縊死徐揆衢州人靖康中以太學生上書金酋請還二帝為所殺建炎中贈宣教郎官其後

郭永大名元城人為北京提刑建炎二年女直陷北京永死之家屬皆遇害

劉汲呼陵人為鄧州安撫使時女直陷鄧州汲死之通判鄭州趙伯振知潁昌府孫默知汝陽府郭贊皆不屈死

劉倚友字夢澤處州人靖康初以進士宰開封金人犯闕受檄為東壁彈壓官登城按視為寇所獲脅使降倚友罵不絕口死之

孫昭遠字顯叔眉山人建炎中為河南尹金兵來攻衆欲擁昭遠南還昭遠罵曰若等衣食縣官不以此時報國耶叛兵怒反擊昭遠遂遇害官屬無免者贈徽猷閣待

制

唐重字聖任眉州彭山人建炎中為永興軍經畧使知京兆府城陷不屈而死贈資政殿學士謚恭愍時副總管相宗閔提舉軍馬程迺等俱死之

續文獻通考 卷之六十三  
曾孝序字逢原晉江人建炎初知青州金兵至為叛卒所害城遂陷贈孝序光祿大夫謚威愍子許承議郎餘贈官有差

陳求道字得之咸寧人建炎中為襄鄧隨郢鎮撫未幾招撫劉忠叛欲奉求道為主求道正色斥罵賊拔出舌斷之妻及二子俱被害

王琦弓門砦巡檢建炎中禦金人于熙河金人立招降旗衆皆招拜琦獨不拜金人殺之

楊粹中真定人建炎二年知濮州時金人入寇粹中固守月餘城陷粹中登浮圖不下粘罕嘉其忠義許以不死粹中竟不屈而死事聞贈徽猷閣待制

向子韶字和卿敏中之從孫舉進士累官京東轉運使高宗朝知淮寧府金人犯城子韶親擐甲胄率諸弟誓以死守及城陷為賊所執執手責罵金人殺之闔家遇害贈通議大夫謚忠毅

周中維州人建炎二年金人攻城中率家衆乘城拒守城陷闔門死之紹興六年贈官

杜昉為密州通判建炎初寓居武陵賊鍾相亂欲強使從已昉罵不絕口遂遇害

上官悟字仲達用蔭累官秘閣修撰充京畿轉運使建炎三年為京東副留守時劉豫叛降金因遣人說降悟斬其使復賂悟左右使說悟復斬之金兵攻東京愈急力

不能支城陷死之贈右文殿修撰官其後五人

王復知徐州建炎三年女直陷徐州復死之闔門百口皆被殺贈資政院學士謚壯節

章雲就麗水人建炎中賊將逼處州雲就以守將募往諭降賊許諾既而官兵掩至賊以爲賣已遂遇害後人立祠祀之

張縝金壇人建炎中守揚州金兵圍城城陷縝及妻子皆死之

楊邦乂吉水人政和進士知溧陽縣僕射杜克隆金濟江鼓行迫城李稅陳邦光率官屬迎拜邦乂以血書衣裾曰寧作趙氏鬼不爲他邦臣金將宗弼遣人說之明日

遙望宗弼大罵宗弼怒剖其心事聞贈直秘閣賜田三頃官爲殮葬卽其地賜廟褒忠謚忠襄官其四子

崔縱字元矩臨川人高宗將遣使通問二帝縱毅然請行乃授朝請大夫右文殿修撰試工部尚書以行比至首以大義責金人請還二帝又三遺之書金人怒徙之窮荒縱不爲少屈久之金人許南使自陳而聽其還縱以王事未畢不忍言又以官爵誘之縱以恚恨成疾竟握節以死洪皓還始歸縱之骨詔以兄子延年爲後

洪皓樂平人建炎初使金不屈欲殺之一酋曰此忠臣也爲請免死得流冷山凡一十五年恒以仁者以大事小智者以小事大章論金酋故宋得與金和歸卒謚忠宣

吳安國字振卿處州人紹興中以太常少卿使金值金人  
渝盟拘留脅服之安國毅然正色曰我首可得我節不  
可奪惟知竭誠死王事王命惡敢辱金人不敢犯遣還  
後知袁州卒

朱弁建安人文公叔父紹興中副使金人令使與  
副探籌歸報弁曰吾將命出國門已置死生度外豈幸  
得先歸哉古者使人有節今無節有印願以印留于我  
正使先歸吾獨在此于是倫解印與之而歸弁留金十  
餘年備嘗艱苦後與洪皓俱歸至今子孫有留印堂

林冲之字和叔莆田人靖康初以主客郎中副中書侍郎  
陳過庭使金同被拘執初猶給乳酪迨宇文虛中受其

命金人亦以是邀之冲之奮勵見詞色金人怒徙之奉  
聖州二年過庭卒金人逼冲之仕偽齊不屈徙上京又  
不屈置顯州極邊沍寒之地幽佛寺十餘年漸復飲茹  
以義命自安髭髮還黑病亟語同難者曰某年七十二  
持忠入地無恨所恨者國讐未復耳南向一慟而絕僧  
窆之寺隅洪皓歸朝以聞詔與二子官過庭亦卒于燕  
建炎中謚忠肅

滕茂實字秀穎東陽人一云臨安人靖康元年以工部員  
外郎假工部侍郎副路允迪出使爲金人所留時茂實  
兄絢通判代州已先降金粘罕素聞茂實名乃遷之代  
州又自京師取其弟華實同居以慰其意欽宗自離都

城舊臣無敢候問啟居者茂實聞欽宗將至卽自爲哀詞且篆宋工部侍郎滕茂實墓九字取奉使黃旛裹以授其友人朔寧府司理董詵欽宗及郊茂實具冠幘迎謁拜伏號泣金人諭之曰國破主遷所以留公蓋將大用逼令易服茂實力拒不從見者墮淚茂實請從舊主俱行金人不許憂憤感疾卒雲中詵歸錄所爲哀詞言于張浚以詵爲陝西轉運判官上其事紹興二年贈龍圖閣直學士官其家三人

魏行可建州建安人建炎中以太學生應募奉使補右奉議郎假朝奉大夫尚書禮部侍郎充河北金人軍前通問使時河北紅巾賊甚衆行可始懼爲所攻旣而見使旌皆引去行可見金人于澶淵金人知其布衣借官待之甚輕留不遣行可嘗貽書金人警以不戢自焚之禍大國舉中原與劉豫劉氏何德趙氏何罪若亟以還趙氏賢于奉劉氏萬萬也紹興六年卒十三年張邵來歸言行可執節没于王事行可父通直郎伯能亦愬于朝遂贈朝奉郎秘閣修撰先已官其二子一弟至是復官其一孫行可之使也吳人郭元邁以上舍應募補右武大夫和州團練使爲之副不肯髡髮棄官亦卒于北闕進隸宣武建炎初遣使通問進從行旣至雲中府金人拘留使者散處之進亡去追還留守高慶裔問何爲亡對曰思大宋耳又問我主待汝有恩汝亡何故進曰錦

衣玉食亦不戀也慶裔義而釋之凡三亡乃見殺臨刑  
進謂行刑者吾南面受刃南則我皇帝行在也行刑者  
曳其臂令面北進踴身直起盤旋數四卒南面就死  
朱勣爲武進校尉從使者至北在粘罕所爲求妻室固其  
意不半月亡去追之還勣含笑死挺下

李之邵建炎初爲新喻武尉隆祐太后幸虔州從後軍叛  
之邵拒之兵敗不屈大罵賊感殺之賊酋壯其言誅害  
之邵者

易青惠州人爲都督行府摧鋒軍經畧使效用紹興中爲  
廣賊所執終不從賊怒焚死之贈保義郎閤門祗候

何斌爲殿前司將官童德興提禁旅戍邵武紹興中竭力  
禦盜而死其屍僵立移時始什贈武節大夫錄其後一

人

連萬夫建炎四年郡賊犯應山破之賊知萬夫勇敢謀欲  
留萬夫萬夫怒厲聲罵賊爲所害贈右承務郎

鄭覃字季厚明州人靖康二年貢于鄉建炎四年金人陷  
州覃爲兵所劫去逼使之降厲辭罵不屈躍入水中

死覃自沈後以孫清之顯貴贈太師秦國公董秦

國

趙立徐州益村人建炎四年以鎮撫使兼知楚州堅守孤  
城爲飛砲所中而卒贈奉國節度使儀同三司官其子  
孫十人謚忠烈

阮駿字千里莆田人紹聖初登進士第建炎初為河南府少尹金人來寇拒戰不利亟收兵護神御殿而以餘兵再戰兵敗抱神御罵賊至死聲不絕口特贈奉直大夫薛慶起羣盜據高郵後歸朝與金人力戰而死贈保寧軍承宣使官其家十人封其妻顧氏

楊照濠州將官也金人圍城照刺賊洞腹抽腸俄中流矢死有都統丁金者遇賊十八里洲被圍大呼其徒勉以毋得負國一舟二百人皆闕死並贈承信郎錄其後

樊昌進賢人建炎初以書生為閤門祗候舍人王虎謀逆率鄉民力戰死之紹興中贈修職郎

凌唐佐字公弼休寧人登元符進士建炎初知建康府城

陷劉豫使守應天唐佐欲圖豫密疏虛實上于朝事泄被捕見豫責豫曰國家何負于汝而反面事虜耶豫怒命引出斬之事聞贈徽猷閣待制

閻琦靖康中為承務郎二帝北遷後宗室南渡不及者多散民間豫募人索之琦匿不以聞為豫杖死

劉化源耀州人知隴州城陷被執金使人守之不得死遂驅入河北鬻蔬果隱民間十年終不屈辱同時原州通判朱璞簽書簿州判官劉長儒皆與化源同鄉亦不屈于豫紹興中各轉兩宮奉祠又鳳翔教授陰暉彭陽知縣李嘉皆守節不屈贈朝奉郎官其家一人

龔楫字濟道原之孫仕為兵部侍郎本處州人居和州兀

木據和州楫率家屬襲之不克而死

方允武衢州人為宜興巡檢建炎三年與金寇力戰而沒  
曾志字仲常鞏之孫建炎初通判温州金酋巴八陷越志  
獨不屈盡驅其家屬四十口同日殺之事聞官其弟與  
三子及兒子皆將仕郎

宋昌祚和州鈐轄建炎初兀朮犯和州州人推昌祚權領  
軍事城破昌祚與倅唐景歷陽令蹇譽司戶徐兢縣尉  
邵元通及指揮鄭立軍士胡廣皆死譙樓上軍士多不  
降保麻湖水砦事聞贈官錄其子弟

郭瓚內江人建炎初為汝陽令金人陷城瓚朝服坐廳事  
戟手大罵與二子俱死

金光庭羅源人累官光祿寺丞出知南陽郡建炎初金人  
陷南陽不屈而死舉家悉遭殲戮

王相如宣城人建炎初江右盜起被執逼令草檄相如奮  
髯曰吾雖死不能為賊作牒遂遇害盡室殲焉

趙不試太宗六世孫建炎初知相州金人求割地不試固  
守不下及州被圍久外援不至不試知不可為遂登城  
與金人約勿殺許之既啟門乃納其家井中然後以身  
赴井命提轄官實以土州人皆免于死

趙令晟燕懿王玄孫建炎中知黃州城陷不屈而死贈徽  
猷閣待制謚忠愍

趙振伯太宗八世孫建炎中通判鄭州守城力戰遇害贈



朝請大夫官其一子

趙叔憑太宗之後建炎間為陝州都監金人圍陝州既久援兵不至城危時叔憑子官盧氏遺以蠟丸書曰人臣當死難兄吾以近屬其可展命耶死固其所也遂死之

時通

職官劉效陳思道馮涇李岳杜問縣令張

玘

等五十一人俱死無降者

趙士路

曾孫靖康末為右監門衛大將軍吉州團練使金

使

將舉義金人殺之贈保寧軍節度使謚忠果

趙叔皎秦悼王四世孫建炎中為德州兵馬都監城陷為

金人所執不屈而死

趙訓之字誨道秦悼王五世孫建炎二年知吉州永豐縣

與尉陳自仁衛益太后于虔州俱為叛賊所害贈訓之

朝散郎直秘閣謚忠果自仁通直郎

趙聿之安定郡王叔東子建炎中為成忠郎金人陷潭州

為所執大罵而死贈左監門衛大將軍時武經郎衛玠

亦死之贈武經大夫皆官其家

李亘字可大交州乾封人建炎中劉豫使守大名密謀圖

豫事洩而死贈官立祠曰愍忠又有武顯大夫孫安道

為應天府兵馬鈐轄城陷不得歸謀挺身還朝為人所

害而死贈忠州刺史

陳淬字君銳莆田人建炎中以淮南招撫使援建康與從

子仲敏俱死贈拱衛大夫明州觀察使官其子壻

郝仲連昌化人建炎中為貴州防禦使權河中府事城陷不屈及其子皆死贈中侍大夫明州觀察使

韓青為熙河馬步軍第六將間行從劉惟輔為金人所擒罵不絕口死

彊寬自金歸宋知環州與其弟震堅守孤城城陷不屈死焉贈觀察使立廟西和州賜額旌忠

李伸知天長縣建炎中金虜陷城不屈而死

牛皓福津人為川陝宣撫後軍中部將與金人力戰而死時承信郎高萬且罵且戰與熙河路部將任安宣撫司隊官秦元薛琪張亨皆死于陣後皓安贈翊大夫官其

家五人贈萬元等官錄其子

孫暉霍丘人靖康之亂率淮民團結保護鄉井擢昭信尉

建炎中金人將渡淮暉率射士民兵禦之城陷竟死于

勅書樓

屈堅為忠州防禦使建炎三年救陝府圍被害贈三官錄

其家五人

方致堯寧國人賊感方寇寧國致堯中流矢臥不能起遂為所執罵而死謚義烈詔立祠祀之

王棣守開德府建炎二十年九月金兵寇開德棣死之

孫安武長沙人為州學正金人入城安武率居民巷戰金人四面縱火人皆竄伏惟安武挺身罵不絕口死

劉玠潭州將官建炎中金人陷潭州玠挺身血戰中數十矢死于陣民為立廟張栻作記

胡唐老字俊明宿之曾孫也建炎中知歙江府潰卒戚方等欲犯臨安唐老諭以順逆眾環脅之唐老怒罵遂遇害贈徽猷閣直學士謚定愍時安撫司機宜鄭凝之亦以兵死詔官其家一人

王儔以通判真州權通判廣德軍建炎末戚方為亂與權判官李唐俊權法司潘偶權知廣德縣韋績權丞蔣瓊皆死俱贈卹

朱嗣孟樂平人以廣德司戶安撫戚方被害贈宣教郎官其子

劉晏字平甫嚴州人以進士來歸累功直龍圖閣後授

宣城為戚方所害贈龍圖閣待制官其子四人死所立

廟曰義烈

鄭振字亨叔仙遊人率鄉兵禦磨鉢又賊遇害廟食里中袁顯益陽人建炎中湘寇楊么猖獗顯請于縣宰魏舜臣團鄉兵以捍一日賊傾寨來戰顯極力鏖戰為賊所得賊欲用之顯罵賊不屈么置諸鼎鑊而死

程全休寧人為筠州都監金人犯江西守臣遁全攝州事賊劫掠至郡全兵拒之兵少力罷賊遂剗其腹而去贈協大夫錄其子孫

孟彥卿忠厚從父建炎中通判潭州與潰賊杜彥戰死于

瀏陽時添差通判趙民彥邑士謝淳俱于賊力戰被執  
殺之贈彥卿民彥直龍圖閣官其家各三人淳贈成忠  
郎官其子希古後朱熹帥潭爲請立廟

王煥知武當縣建炎中賊犯均州煥率邑人保山寨賊至  
或勸之遁煥曰使吾有此心則不能與邑人爲此舉矣  
遂舉家死之

謝臯開封人爲鎮撫使統制官建炎中李成陷虢川欲降  
之臯指腹示賊曰此吾赤心也自剖其心以死

薛良顯字貴勤瑞安人以河東轉運使與江寧亂軍周德  
力戰不勝而死贈卹甚渥

丁公膺醴陵人爲高郵尉紹興初拒金兵力戰死之朝廷

嘉其忠節官其子倚

梁楚電白人紹興中攝縣令交趾犯境力戰連斃數賊後  
城破被害高宗贈禮部侍郎

唐傑知扶風縣與金將馮宣戰宣愛傑欲招之傑奮曰吾  
當死于陣不能降敵宣乃殺之

徐景知興化縣楚民胡德等寇掠馳入縣治景諭以順逆  
禍福賊怒欲害之景曰人誰不死得死王事亦何不可  
但勿傷百姓吾含笑入地矣賊義而不加害

王玠斲黃鎮撫使司幹辦公事會鎮撫使孔彥舟謀叛玠  
開陳百端不聽入罵曰逆賊萬段彥舟怒并家屬沈之  
龍眠磯

范旺順昌人爲縣巡檢司軍校紹興初順昌盜俞勝苛作亂土軍陳望者與射士張袞謀舉若應之旺叱不從凶黨剔其目而殺之妻子皆遇害賊平旺死迹在地隱隱不沒邑人驚異爲設像城隍廟歲時祭享六年詔贈承信郎更立祠號忠節二十八年復詔立愍節廟以祀之呂祉字安老建陽人宣和初上舍釋褐紹興中知建康府累官兵部尚書參謀軍事以鄜瓊叛執祉迫使趨劉豫祉大罵不從遇害贈資政殿大學士慶元間立廟賜額以旌其忠

李靚龍泉人紹興十年與虜戰敗死之詔贈兩官仍官其一子

舒繼明羅山人善射紹興間守信陽偽齊劉豫襲郡城矢

盡被擒罵賊而死

唐敏求字好古當塗人爲德化主簿盜起挺身率衆扞禦遂遇害贈升朝官補其子楠將仕郎

王師道字居中兗州人紹興中任吉州粟傳若巡檢與賊戰于吳村而死立廟其地官其二子

楊載涪陵人金人立劉豫載願得白刃橫行虜中當手刃劉豫張浚壯其言使偕十士至金僞降載行反間豫果廢及欲刃虜酋而十士已亡其八遂決南歸

朱勇利州都統捍金人有功戰于瓦亭寨被執罵不絕口死賜廟名忠節

朱友恭涇源路第一副將捍金人有功徠被執不降遇害  
朱躡湖州安吉人爲錢塘令金兵迎戰歎敵使民得爲逃  
計中流矢創甚猶叱左右負已擊賊後數日遇害

王倫大名人紹興十四年以行人使金金欲以爲平灤二  
路都轉運使倫曰奉命而來非降也金脅以威倫拒益  
力俾縊殺之倫遂冠帶南鄉再拜慟哭曰先臣文正公  
以直道輔相兩朝天下所知臣今將命被留欲污以僞  
職臣敢愛一死以辱命遂就縊於是河間地震雨雹三  
日聞者哀之

姚興相州人以武功累遷荆湖南路兵馬副都監紹興二  
十一年金人渝盟興隸都統王權麾下時權奔仙宗山  
巖兵自衛興告急數不應初李二者嘗有私恩于權因  
得出入軍中竊權旗幟以遺金人至是金人立權旗幟  
以誤興興奔之父于俱死焉詔贈容州觀察使謚忠毅  
立廟戰所賜額曰旌忠

孫知微高宗時通判舒州淮賊劉忠薄舒州知微繕城郭  
治甲兵力與之抗久而不下及入舒知微被執又不屈  
忠怒齧食之後朝廷官其二子

李明高宗時金兵入犯明從宣撫使楊存中力遏其衆外  
援不繼死之廕其子守中爲進武校尉

李邁字彥和龍泉人紹興中以承信郎與金人戰于西京

隆宣撫死之

劉宣為秦鳳路兵馬都監密遣蠟書與吳玠相約且欲率金將任拱等以所部歸朝金人覺取宣縷劈之家屬配

曹州

韓浩知淮州高宗時金兵攻濰州城陷浩與通判朱廷傑皆力戰死北海縣丞王允功司理王震皆全家陷沒浩特贈三官官其家三人餘各官其家一人

王忠植太行義士紹興中以功為河東經畧安撫使為叛將趙惟忠所執不屈而死贈奉國軍節度使開府儀同三司官其家十人

唐琦本衛士建炎中欲襲擊金將琶八不克而死詔立廟賜名旌忠

馬俊太平州慈湖砦兵紹興中周青等據州叛俊隸青左

右得其陰謀潛結其徒期殺賊于是伺青上馬斫中頰而其徒不敢前遂與妻子俱遇害贈俊修武郎立祠號登勇

翟興字公祥河南伊陽人紹興元年為忠州團練劉豫憚之啗裨將楊偉以利偉殺興攜其首奔豫弟進知河南府亦為賊楊進所害俱贈官錄其家

劉惟輔涇州人任熙河副總管為金人所執誘之百方竟不從而死詔贈昭化節度使官其子孫十二人立廟成州號忠烈

朱良字良伯仕海鹽尉時金人分兵入境良集射士百餘

奮而前然力不敵竟死事聞官其子思孜等

劉十六郎瑞金人金虜犯境十六郎昆弟三人義勇戰死  
岳飛以聞詔立祠旌之

魏彥明開封人通判延安金人陷西城彥明死節詔贈中  
大夫官其一子

郭正孫邛州人官大府寺丞帥與元金人內侵屹守孤城  
三戰三却左右勸之避正孫不從遂死于敵

金從龍浮梁人知盧州虜寇大至力不能支死之贈官廕  
其子

張文之樂平人通判濠州金兵至被執送燕山欲授以官  
不屈囚之士窟後王朴清于囚得一家書附還朝廷悼

嘆月給恤其家官其子孝忠

黃友字龍友平陽人也金人入寇友通判澶州戰敗被執  
不屈死之帝書忠節傳家四字旌其門

鄭驤字潛翁玉山人建炎初以直秘閣知同州金人來寇  
援絕力孤城陷虜衆欲降之不屈曰所謂太守者守死  
而已遂死之詔贈通議大夫謚威愍官其子五人後復  
加贈樞密直閣學士立祠同州賜廟額曰愍節

毛士毅富川人爲化州石城令李接反來攻城士毅謂尉  
曰吾與君當以死衛百姓糾合義丁與賊戰衆寡不敵  
遂罵賊死高宗贈承事郎

劉位招信人知滁州節制徐泗二州軍事金人入寇遣使



誘降位斬其使後出戰中流矢歿于陣贈建寧軍節度使建廟滁陽號剛烈

邊知章字公望通判開德府金人犯闕尋以和退明年冬虜大至城下知章軍潰死之贈朝散大夫官其二子

韋永壽以統制官紹興末與子承節同死于和州父子同贈官

种朴洛陽人諤之子以父任右班殿直累遷熙河蘭會鈐轄兼知河州時蕃部叛屬羌何章入寇帥胡宗回使朴討之朴至州纔二日賊鋒方銳且盛寒欲姑徐之馳檄至六七不得已遂出兵羌知朴來伏以待朴遇伏首尾不相應朴殊死戰為賊所殺事聞贈雄州防禦使官其

後十八

張玘字伯玉澠池人紹興末以御營宿衛軍前都統與金人力戰于海州北中流矢卒贈正任觀察使官其後九人廟號忠勇孝宗即位又命祠于戰所贈清遠軍承宣使子世雄武節大夫

陳亨祖淮寧大豪紹興末以功知海寧府與金兵力戰舉家五十餘人皆死贈容州觀察使立閔忠廟于光州劉泰樞密院忠義前軍正卒也金人犯壽春泰身被數十創死贈武翼郎官其家三人

郭僕字同升祥符人以父任調東海縣尉歷遷通判全州權梁宰未行會賊張項已逼縣境衆止之僕曰安逸則

就艱危則辭非我所學竟至縣約束吏卒誓以死戰賊聞之僞降既入邑爲變官皆竄伏僕曰吾爲宰義不可去端坐公署賊徒至僕大罵不絕口遂遇害詔贈承議郎錄其後二人

王觀國登紹興壬辰進士授陝州宜興縣尉遇黃巾賊不屈遇害事聞詔贈官一等

王拱建康府前軍統制隆興五年與金人力戰于江北而死贈正任觀察使卽其砦立忠節廟又忠亮大夫朱贊亦死之贈承宣郎

吳庸淳熙間李接作亂庸與同郡徐邦直唐捷起兵禦不克庸歿于陣徐與唐罵賊而死帥劉惇上其事俱贈承

仕郎仍官其子

王輝貴州人嘗爲栗傳砦巡檢淳熙二年擊茶寇爲賊所得欲全之含血大罵遂死贈忠州刺史與恩澤二人立廟羅坡

楊震仲字華父成都人淳熙中吳曦招之不從飲毒死贈朝奉大夫直寶謨閣官其二子表其里曰義榮謚節毅立廟旌忠

吳政寧宗嘉定十二年女直寇西和成鳳州入黃牛堡政死之

李誠之字欽茂東陽人寧宗時知蘄州金人南侵城陷于士元戰死誠之引劍將自剄呼其孥曰城已破汝等宜

速死無辱妻許及婦若孫皆赴水死事聞贈朝散大夫  
秘閣修撰封正節侯賜廟曰褒忠

秦鉅字子野檜曾孫通判蘄州城破自焚而死贈秘閣修  
撰封義烈侯祀于褒忠廟于浚渾同死贈通直郎淳祐  
十二年加封鉅義烈顯節侯時教授阮希甫防禦判官  
趙汝標皆死之同時死事者蘄春主簿甯時鳳錄事叅  
軍兼司戶杜諤監蘄州都大監轄蘄口鎮倉庫嚴剛中  
各贈官有差又統制官孫忠小將江士田陳興曹金丘  
卞軍士李斌等皆鬪死司理叅軍趙與裕奪關出外求  
援而全家十六人皆沒黃州陷守臣何大節亦投江死  
陳霖字傳容泉州人嘉定中爲瑞金尉不屈于賊而死

徐梅龜壽昌人爲霍丘尉虜寇犯境梅龜與子尚古皆死

之理宗嘉其忠贈梅龜宣教郎尚古承信郎各官其子  
劉宥知天水縣金兵犯境掠宥行橐視其誥命曰隨我去  
官北朝宥罵曰我爲南朝鬼不爲番賊官遂遇害

彭義斌理宗寶慶元年領兵徇真定嚴實以蒙古兵來襲  
義斌死之

陳寅咸子升卿孫知西和州寶慶年蒙古入西和寅謂妻  
杜氏可避兵鋒杜氏厲聲曰安有生同君祿死不共王  
事者寅死之杜氏飲藥自殺二子及婦俱死母傍賓客  
同死者二十八人

黃復字乾叟沙縣人寶慶二年第進士後攝滁州因虜攻

城援不至歿在圍中遺子書曰父老矣食君之祿繼之以死雖死猶生也

賈子坤童川懷安軍人爲西和州推官寶慶中虜至城陷與其家人十二口俱死之

舒瀛字登甫奉化人登寶慶二年進士第授衢州西安尉兵難卒起瀛先衆捍敵死之朝廷嘉其忠官其子模

曹孝先字元先奉化人官承直郎任楚州錄事叅軍寶慶乙酉沒于王事贈通直郎官其子說立廟號旌忠

劉純字君錫建陽人以父廕補沙縣簿紹定間調湖北帳幹知邵武縣會率兵招降下瞿賊爲賊所得不屈死之事聞贈朝散郎與二子下州文學後又封壯義侯謚忠

烈純之族幹謚忠顯子羽謚忠定琪謚忠肅領謚忠簡純謚忠烈爲五忠劉氏

趙師欐淮右人以罪客游于閩紹定中寇起汀州郡司農丞潘景伯嘗守高郵知師欐荐于提刑王夢龍俾統兵禦尤溪賊大書旗上曰誓不與賊俱生轉戰田中馬陷于泥賊斷左臂猶以右手殺賊力盡大呼曰師欐報國死于此矣遂歿嘉熙初都丞旨王堃上其事贈武節郎民爲立廟名忠愍

高談字景遂邵武光澤人紹定二年爲旁郡賊執欲其率鄉子弟東破武陽談唾賊大罵遂遇害而里人賴以免曹友聞字允叔彬十二世孫端平初權知沔州與蒙古兵

戰于鷄冠隘與弟萬皆死贈友聞龍圖閣學士大中大  
夫賜廟褒忠謚曰節官其二子承務郎塔廸功郎贈萬  
武翼大夫官其二子成忠郎

高稼蒲江人魏了翁同產也知沔州端平二年蒙古潤端  
入沔稼死之贈龍圖閣直學士謚曰忠

李復明爲江陵統制端平三年蒙古將忒木解寇江陵復  
明死之

楊壽孫爲雲安軍主簿端平中元兵至中江縣與蔣官何  
庾安惟臣田廣直友坤等連戰二日俱死之贈恤有加  
劉銳知文州嘉熙元年元兵攻急銳集其家人盡飲以藥  
而死家素有禮法幼子同哥方六歲授以藥猶下拜受  
之左右感慟銳父子三人登文王臺自刎死

趙汝彞宣城人爲文州通判城陷不屈元人先斷其兩臂  
而後斮殺之

何克漢州德陽人通判黎州攝州事元兵破關自刺不死  
百方誘之終不從臨死時東望再拜曰臣夫婦同死可  
以對趙氏無愧矣上下感泣同死者四十餘人男士麟  
孫駒行從子仲桂先克死惟長子士龍得免

蹇彞潼州通川人通判金州端平中元兵攻陷金州彞舉  
家死焉弟維之利州行叅軍事亦迎敵力戰死官其子  
王迸字純文饒州樂平人紹定間爲固始縣簿攝邑事金  
兵犯淮守令望風遁去迸度力不能禦懷印自投于井

而死

鄭勳字景周興化縣人嘉泰壬戌登第端平中知博羅縣  
熊喬部下回戍卒焚掠州境或勸勳避其鋒勳曰吾爲  
長官見賊而去如吾民何衣冠坐廳事賊至諭以禍福  
不屈死之事聞贈朝奉郎

陳隆之爲制置使成都將田世顯以城叛降于蒙古隆之  
舉家數百口死于元兵贈徽猷閣待制加與兩子恩澤  
賜謚立廟

吳從龍字雲奉化人紹定中以建寧都統制爲先鋒援不  
至被擒不屈而死廟祀泰揚二州賜額褒忠官其弟從  
虎

孫孟泰興人紹定中李全犯揚州應縣令王煥募爲兵後  
賊勢甚盛身先赴敵死之贈保義郎官其子一人同時  
顧緒顧珣皆戰死贈恤亦同

王仙蜀都統守涪州二年城破自刎斷其吭不死以兩手  
自槌其首而墮

曹琦蜀進士知南平軍被執脫身歸制置司辟主管機宜  
文字聞統制趙安以城降就守禦地自經死

侯畝字道子樂清人寶祐五年制置使賈似道辟通判海  
州與山東賊李松壽鏖戰于連山闔室遇害立旌忠廟  
于海州謚節毅仍立廟其鄉

張順民兵部將也開慶中與張貴同救襄陽不克而死立

廟祀之

陳元桂撫州人開慶元年元人侵臨江元桂力疾督戰有勸其移治者曰時事如此與其死于饑寒盜賊孰若死于守土之爲光明俊偉哉遂死之詔贈待制謚正節賜錢二十萬官其二子勅立廟死所賜額褒忠

曾墳紹興人開慶己未爲瑞州錄事叅軍以州命行各縣賑恤饑民值元兵至被擒不屈死之事聞贈秩官二子羅夢棫新喻人景定元年兵入靖安夢棫死之贈宣教郎官一子

許彪孫奕之子爲四川制置司叅謀官景定二年知瀘州劉整將叛降于元命彪孫草表彪孫曰腕可斷筆不可

書合門服藥死整既降襲都統張桂營桂及統

德戰死納溪曹顛合門死之又景定四年沔州都統胡世全護糧運至虎象山戰死咸淳二年元兵取開州守將龐彥海死之德祐元年瀘州守梅應春以城降珍州守江彥清巷戰死之

密祐廬州人守隆興咸淳中元兵下隆興密祐爲都統兵敗被執不屈而死

張漢英奉化人爲樊城守將時樊城被圍四年與都統制范天順牛富力戰不降既城陷漢英死焉天順仰天嘆曰生爲宋臣死當爲宋鬼於守處縊死牛富身被重傷以頭觸柱赴火死裨將王福見富死嘆曰將軍死國事

吾豈宜獨生亦赴火死後天順贈定江軍承宣使

史季儉威州棋城主簿也成都陷子良震與壻楊誠夫爭先為死各特贈兩官與一子下州文學

王翊字公輔郫縣人嘉熙元年為制置使丁黼叅議官元兵破蜀朝服赴井死時轉運副使蒲東邠亦死之元兵屠漢州權州事劉當可判官邵復錄事叅軍羅由司戶叅軍趙崇啟知雒縣羅君文皆不屈而死復雍六世孫也兵入眉州知丹稜縣馬仲燁死之取簡州簡守李大全死之邛守趙晨力戰死之至遂寧民兵趙用拒戰臂已斷而戰不休至重慶進士胡天啟夫婦同罵賊死翊與趙汝彛同立廟賜謚餘褒恤有差實祐六年元兵援

吉平隘守將楊禮周德榮死之拔長寧守將王佐父子俱死至閬州推官趙廣死之至蓬州轉運使施擇善死之至順慶帥守段元鑑堅守為麾下殺之以降

陶居仁蕪湖人為鎮江錄事叅軍元兵來攻城陷被執居仁曰得以死報朝廷夫何憾竟不屈為所殺護棺還家泝流數百里不時而至鄉人異之為立祠

張孝忠淮人德祐初呂文煥遣元兵東下知信州謝枋得走入安仁調孝忠逆戰團湖坪矢盡揮雙刀擊殺百餘人後伏兵發孝忠中流矢死

王世昌德祐初權瀘州安撫使後元兵逼城誓不屈節城破自經死



續文獻通考 卷之六十三  
邊居誼隨州人爲新城守將咸淳中元人進逼新城居誼  
堅壁不降呂文煥至城下招之居誼射煥中其右臂率  
所部三千死戰皆沒居誼赴火死事聞贈利州觀察使  
立廟死所

趙昂發字漢卿昌化人德祐元年權守池州元人陷池州  
昂發死之初元人遊騎至李王河都統張林諷昂發迎  
降昂發瞠目視林不敢復言已而林陰遣人納款昂發  
知事不濟乃謂妻雍氏曰城將破吾守臣不當去汝先  
出走雍曰君爲命官吾爲命婦君爲忠臣吾獨不能爲  
忠臣婦乎昂發笑曰此豈婦人女子所能也雍曰吾請  
先君死昂發笑止之明日乃散其家貲與弟姪僕婢悉  
遺之及元師薄城昂發晨起書几上曰國不可背城不  
可降夫婦同死節義成雙遂與雍氏盛服同縊從容堂  
伯顏入城問太守安在左右以死對深歎惜之命具棺  
衾合葬祭其墓而去

唐震字景實會稽人爲饒州知州元軍入饒遣使來取降  
款通判微諷震降震怒叱之曰我何忍偷生負國也城  
中年少感震言殺元使者已而城陷執牘使署降震不  
屈遂死焉兄椿與家人俱死贈文華閣待制謚忠介廟  
號褒忠官其二子震客馮驥何新之後俱死節

江萬里都昌人以故相家居聞元兵破襄樊乃鑿池芝山  
後圃扁其亭曰止水人莫喻其意及城欲破遂赴止水

死左右及子錡相繼投沼中積屍如疊翌日萬里屍獨  
浮出從者斂葬之贈太師益國公謚文忠

鮑廉知臨江軍元人徇臨江廉死之

馮仲燁知丹稜縣元兵入眉州仲燁死之

米立爲江西都統元軍畧江西立逆戰於江坊兵敗被執  
不降繫獄制置使黃萬石舉軍降元元行省遣萬石諭  
立曰吾官銜一牙牌書不盡今亦降矣立曰侍郎國家  
大臣立一小卒耳但三世食趙氏祿趙亡何以生爲立  
乃陳上生擒合死之人與投拜者不同萬石再三諭之  
不屈遂遇害

阮應得守無錫德祐中蒙古兵入無錫應得死之

王汝翼知廣德縣德祐中元人入廣德汝翼死之

司馬夢求監岳州沙市城鎮德祐中蒙古阿里海涯入岳

州沙市城夢求死之夢求司馬光五世孫也

夏椅安慶通判蒙古兵犯安慶知府范文虎以城降椅力  
不能自爲曰有死而已乃飲藥卒衣襟中有遺筆云職  
當其遽厄逢其否負吾君親方寸亂矣命無所逃當死  
而死五十六年歸其天理

趙與糖守寧國德祐初蒙古陷寧國與糖死之

姚訐知常州德祐初蒙古伯顏陷常州訐與通判陳炤都  
統王安節死之炤字光伯常州人城陷或勸走常熟炤  
曰去此一步非死所矣遂止死焉安節堅之子也守常

州方圖恢復不克而死贈言龍圖閣待制炤直寶章閣  
並官其子時節度判官胡應炎武進知縣包圭俱晉陵  
人亦同戰死

徐道明常州玄妙觀道士德祐初元兵屠城道明知太守  
姚訾死守取觀之文籍置石函藏坎中危坐燭香讀老  
子書兵至以刃脅使拜不為勅遂死之

汪立信新安人德祐元年賈似道將出師召立信為招討  
俾就建康府募兵以援江上諸郡既至建康守兵悉潰  
四面皆元兵立信知事不可成率所部四十人至高郵  
欲控引淮漢以為後圖及聞似道師潰嘆曰吾今日猶  
得死宋土乃扼吭而死

劉霖昌州永川人後居瀘州安撫使梅應春以城降元霖  
說合州張珪潛斬關入城殺應春復瀘州珪以霖知南  
平軍後卒死于兵

彭震龍永新人知永新縣值元兵至城守不下親黨劉槃  
內應執震龍去震龍罵不絕口腰斬之

蕭燾夫與兄敬夫吉安人見文天祥起義兵兄弟協贊彭  
震龍謀復永新縣屠兄弟同死之

尹玉寧都人從文天祥勤王死于伍牧贈濠州團練使官  
其二子賜田二頃以恤其家

程洙休寧人淳祐十年進士授貴池縣簿調上元縣德祐  
元年建康陷百官投牒降附程洙自縊而卒

李成大字實夫建昌人德祐初知金壇縣元兵至與戰不勝吏民脅之降乃潛與胡用存謀復金壇事泄繫獄至殺其二子終不屈死贈直秘閣謚忠節

李天勇臨川人德祐初元攻饒州天勇統強壯應援兵敗與張忠孝俱死之

李芾字叔章由廣平爲汴人官潭州知州元兵圍潭日久芾慷慨登陴與諸將分地而守民老弱皆結保伍相助不令而集芾日以忠義勉其將士死傷相籍猶乘城殊死戰城將陷召帳下沈忠遺之金曰吾力竭分當死吾家人不可辱于俘汝盡殺之而後殺我忠泣而諾取酒飲其家人盡醉乃徧刃之芾亦引頸受刃忠縱火焚其

居還家殺其妻子復至火所大慟舉身投地乃自刎參議楊震赴園池死妻妾奔救無及遂皆死幕僚陳億孫顏應焱皆死潭民聞之多舉家自盡城無虛井縊於林木者相望寶慶通判曾如驥亦不屈而死事聞贈芾端明殿學士謚忠節

尹穀衡州進士寓居潭城元兵至知事不可爲乃爲二子冠招鄉人行冠禮鄉人曰此何等時行此迂濶事穀曰正欲令兒曹冠帶見先人于地下耳旣畢禮與其家人自焚潭太守李芾命以酒酹之

李長庚爲湘潭丞元兵至被執不屈死之

趙良淳汝愚曾孫爲安吉州知州與提刑徐道隆固守元

兵圍安吉范文虎致書誘良淳降良淳焚書斬其使既而戍將吳國定開門納元兵良淳閉閣自經道隆見執守者少怠亦赴水死

鄧得遇字達夫邛州人德祐二年爲廣西提刑守蒼梧元人徇桂林州南望拜書紙曰宋室忠臣鄧氏孝子不忍偷生寧甘溺死彭咸故居乃吾潭府屈公子平乃吾伴侶優哉游哉吾得其所遂投南流江而死

徐夢發浦城人登嘉熙二年進士第累官朝議大夫廣奉招捕使德祐二年元兵下江南夢發守仙霞襲兵猝至左右皆潰夢發獨踞坐大詬遂遇害

李申巽知上猶縣德祐二年元兵攻上猶申巽死之邑人李粹一家四十七口俱死之

豐存芳字公茂鄞人稷玄孫也爲太平州倅景炎元年蒙古兵至知州孟知縉謀以城降存芳諫不聽詈之知縉遂引蒙古兵屠其家同死者十八人卒方義竊其八歲孤匿民間得存其祀

劉子荐字貢伯安福人爲廣西經畧使叅議官元兵至靖江時宋主已入燕子荐取笏書曰我頭可斷膝不可屈堅守而死

呂文信文德弟也德祐初以沿江副使叅議官與元兵遇于白鹿磯戰死贈定遠軍承宣使官其子立廟賜額時河湖巡檢張興宗亦死之贈武翼郎仍賜錢官其子

鍾季玉樂平人德祐時爲大都提點坑冶元兵渡江徙寓建陽兵至不屈死之

潘方平陽人監慶元府市舶慶元降元方不屈死之

耿世安爲兩淮都撥發官迎元兵鏖戰身被七創猶能追殺收兵還至數里歿贈五官立忠武廟于淮安

丁黼成都制置使也與元兵力戰死于石筍街賜額立廟王孝忠爲鎮江前軍統制兼淮東路分戍淮陰楊貴叛孝

忠率衆迎戰俄永軍統制朱信降賊孝忠力不敵死焉姜才濠州人貌短悍知兵善射騎爲通州副都統與元兵

屢戰屢勝復守揚州元將使人招之才曰吾寧死豈作降將軍耶被執死之

蕭龍雷字顯辰新城人建昌降元與同里人黃巡檢起兵

圖興復度勢不可支將奔入閩爲同安武人徐浚冲獲送縣縣尹劉聖仲素與龍雷有怨殺之後聖仲于小孤

山見其神驚死

宋應龍以諮議官寓泰州元兵至裨校開門迎降應龍與其妻自縊園中

褚一正字粹翁廬州人武舉進士爲提刑諮議督戰高沙被創竟没于水知興化縣胡拱辰縣破亦死之

張鏜衡山人浚之後益王立詔天下勤王鏜起兵衡山得民兵數千與文天祥接應旣而兵敗被執元叅政崔斌

欲降之鏜罵曰今日降而死何以見我祖魏國公于地

系文獻通考卷之六十三  
下斌令述起兵本末鏗奮筆斥罵千百言斌怒殺之

鄒鳳字鳳叔吉水人從文天祥勤王死事同死者泉州陳龍復廬陵劉子浚劉沐龍泉孫臬永新彭震龍蕭陶寧都陳繼周蜀人張忬太平州步卒呂武安豐軍人鞏信太和蕭明誓丞相範從子杜滄閩人林琦温州人徐臻幕下書史蕭資職書司金應樂安何時贛州陳子敬何陳二人隱竄不知所終

劉士昭太和人嘗爲鍼工與鄉人同謀復太和縣事敗血指書帛曰生爲宋人死爲宋鬼赤心報國一死而已以帛自縊死又有王仕敏者與士昭同謀而敗題其裾曰此生無復望生還一死都歸談笑間大地盡爲腥血汚

奸收吾骨首陽山臨刑嘆曰恨吾失聲不能大罵

趙孟壘合州人爲金華尉臨安降與從子由鑑懷太皇太后書詣益王擢宗正寺簿監軍復明州戰不屈磔死

孟余福王與芮從子也元兵駐紹興余謀舉兵事泄執至臨安范文虎詰其謀逆余詬曰賊臣負國厚恩共危社稷我帝室之胄欲一泄宗社之耻乃更以爲逆乎文虎怒驅出斬之過宋廟呼曰太祖太宗列聖之靈在天何以使孟余至此都人莫不隕涕旣死雷電晝晦者久之上官夔萬州守將也元兵圍城夔戰守甚力招之降不從城陷巷戰而死

吳楚材名炎建昌南城人德祐元年建昌降明年春楚材

續文獻通考卷之六十三  
還其鄉領村糾集民兵攻城元兵三道蹙之奪其長梯  
鐵鈎因進攻領村不得入事聞益王府元帥承制遷楚  
材宣議郎帶令太社令知建昌軍俾聚軍圖再舉時江  
西制置使黃萬石匿其命楚材既失利且乏援走光澤  
爲人所執及其子應登以獻郡遣錄事婁南良訊之曰  
何爲錯舉楚材抗聲曰不錯不錯如府錄所爲乃大錯  
耳府錄受宋官爵今乃爲敵用事還思身上綠袍自何  
而得吾一鄙儒特爲忠義所激爲國出力事雖不成正  
不錯也南良媿而語塞後爲江西制置招討使斬其父  
子傳首諸邑益王聞而哀之贈官朝奉郎卽邵武境上  
立廟賜名忠勇

黃介字剛中分寧人德祐初率鄉兵爲保聚計北兵奄至  
面中六矢不動復中十三矢倚柵而死妻劉被虜子用  
中逃不死及壯求母十三年始獲人稱黃孝子

張珏字君玉鳳州人德祐初知重慶府守節不屈而死時  
閬州守將楊大淵推官趙廣蓬州守將張大悅運使施  
擇善皆死節

趙立字德修重慶人德祐初爲大社令湖北提刑使趣蜀  
諸將入衛不成自沈于水

周偉德祐間爲浮梁丞元兵起偉曰以守無城以戰無兵  
柰何然受人之命而不爲其事非仁也食人之祿而不  
死其難非勇也卒死之



趙與擇秀王嗣也德祐二年出鎮瑞安與守臣方洪同伏節而死又有趙孟錦者襲元兵不克而死

徐道隆字伯謙武義人德祐初以江陵提點刑獄入援臨安爲元兵所執與子同赴井死贈官賜謚厚恤其家立廟吉安

洪福夏貴家僮也從貴積勞爲鎮巢雄江左軍統制江北降福與子大淵大源復之貴降元招福不聽使從子往福斬之後爲貴詭誘破城先戮其子次及福福大罵數貴不忠請身南向死以明不肯國也聞者流涕

高應松字實畝長樂人開慶元年進士官翰林權直德祐末元兵至臨安應松不肯草降表後從弟昂至燕絕粒

不語越七日卒

陳奉安仁人益王卽位奉領江東安撫使師屯火焚山戰潰復起兵敗于積烟山與弟年同死之

林空齊永福人失其名舉進士歷知縣解官家居益王立張世傑圖泉州乃率鄉人黃必大劉仝祖卽其家開忠義局起義兵復永福值王積翁以福安送款約北兵屠永福空齊乃盛服坐堂上嚙指血書壁曰生爲忠義臣死爲忠義鬼俄見執不屈而死

李庭芝字祥甫由汴徙爲應山縣人恭帝時守揚州兀术圍揚久庭芝與指揮使姜才守禦益力及臨安旣陷兀术以太皇太后手詔諭降庭芝登城謂使者曰奉詔守

城未聞以招諭降也及帝如瓜州太皇太后復賜庭芝  
詔庭芝不答及夏貴以淮西降兀朮復遣貴降卒至城  
下示庭芝庭芝曰吾惟一死而已使者復持詔招之庭  
芝開壁納使者斬之焚其詔於壁上已福州使至庭芝  
與姜才將兵七千趨泰州兀朮驅庭芝妻子至壁下招  
降會姜才疽發背不能戰泰州守將胡惟孝孫貴開門  
納元兵庭芝赴蓮池中水淺不死遂與姜才俱就執兀  
朮責其不降才曰不降者我也憤罵不已皆見殺揚民  
聞者莫不泣下

徐應獬字巨翁江山人爲太學生景炎元年蒙古伯顏入  
臨安應獬與其二男琦松一女元娘同登樓自焚諸僕

撲火救免乃同赴井死益王立贈秘閣修撰

黃俊爲廣州摧鋒將景炎元年蒙古軍入廣州俊死之

苗再成爲直州守將景炎元年蒙古兵陷直州再成死之  
趙時踐字容月宋末人僑居采石德祐間攝建平縣事元  
人南下入縣提鼓禦敵勢窮與妻子僕妾九人赴溪潭  
死焉

馬塋宕昌人以六郡鎮撫使守咸淳府元將楊文安與塋  
同里招降不聽既而城陷悉力巷戰死之

丘必明保昌人官韶州僉判德祐中元兵逼城下必明不  
屈爲敵所殺白血流地韶人哀其忠節立祠祀之

馬墜爲靜江守將時阿里海牙克靜江府斷其首猶握拳

奮起立踰時始什墜既死部將婁鈴轄等守月城求牛米秣饑而降既得食之擁一火砲然之聲如雷震城皆崩烟焰蔽天外兵多驚死者火息入視之灰燼無遺

黃文政淮人戍蜀軍潰間道走靜江馬堅邀與同守城破文政被執大詬不屈元人斷其舌以次剝削之文政舍胡

胡死不絕聲

熊飛曾逢龍與元人戰於南雄敗績曾死之飛奔韶州元人圍韶州守將劉自立以城降飛率兵巷戰敗赴水死陳文龍字君貴興化人俊卿之後益王稱制時守興化被執元兵欲降之文龍指其腹曰此皆節義文章也可相逼耶卒不屈乃械送杭州文龍不食死

趙時賞張日中德祐二年元李恒襲文天祥於興國縣天祥出走師潰於空院時賞日中皆死之

趙希洎宗室子居宜春德祐中以廣東轉運使勤王文天祥兵敗與從子必向被囚俱不食而死

陳瓚文龍從子也守興化元峻都攻之瓚閉城拒守峻都臨城諭之矢石雨下城破巷戰終日獲瓚車裂之

張德興淮安人景炎二年與淮西野人原寨劉源等起兵興復司空山與黃州壽昌未幾元襲破司空山復陷壽昌德興死之

劉伯文吉水人景炎二年伯文詣督府受文書結約遠近為巡兵所執斬于袁市慷慨自引一不累人

陳學心安仁人歷官高州知府謝枋得起兵令守安仁元  
兵至力戰而死時餘干張仁旦亦率鄉兵應枋得力戰  
而死

楊恕字仲如四明人篤學力行歷陞憲司知事宋祚將危  
以忠義自勵不食數日赴菱塘而死

袁鏞字天與鄞人咸淳進士尚氣節元兵至鄞鏞往軍前  
責以大義元將竒其才脅令降縱火燎之鬚髮盡不少  
變遂死其日家人驚悼赴水死者十有七人

馬發知朝州景炎中蒙古兵陷朝州發死之  
顏思立顏起巖鞠叔華聞文丞相開府于汀相結赴義後  
元兵奄至三人同日死之

張烈良為河南制置使帝昺祥興元年起兵應厓山與元

阿里海牙戰敗死之海南州縣皆陷浸趙與珞亦死之  
陸秀夫字君實盩厔人左右丞相輔帝昺于崖州儼然如  
治朝祥興二年元張弘範攻厓山張世傑兵潰秀夫奉  
帝昺赴海死時丹徒茅相以秀夫薦授兵部侍郎亦同  
死於海

高貴祥符人舉進士累官知高郵府扈從之海上擢樞密  
使與陸秀夫同死厓山

彭呂泰和人元兵陷虔呂不屈入廣從文丞相赴難死  
蕭資吉水人文丞相幕下書史與元兵遇死之

吳希真安福人文丞相起兵真自以名通于督府後遇元

軍衆寡不敵一門三十口俱死之

伍隆起新會人三世仕宋宋末隆起率義兵從帝昺于厓山與元將張弘範力戰不屈其麾下謝文子殺隆起降弘範宋相陸秀夫惜之刻木爲首以葬又募人執文子戮以祭墓

孫梟文丞相之妹壻也丞相方擁兵出贛梟爲叛者所陷不屈死之

劉昂孫江陵人官翰林學士德祐初從二王至厓山陸秀夫負王赴海死昂孫亦驅家屬並輜重沈海不死爲元兵所執榜掠無完膚一夕得脫卒蹈海死

劉洙廬陵人文丞相隣曲也兵敗被執至豫章與長子同

日被刑

張雲吉水人城降元雲不勝忿乃謀興復引所部夜襲元營天明戰渴赴江飲水元軍衝擊之雲赴水死

趙孟濟以功知清江後元兵至城陷孟濟死之

張世傑范陽人以樞密副使越國公立衛王昺于厓山旣敗欲浮海再圖恢復颶風大作舟人欲抵厓世傑曰無以爲也爲我取辦香來乃焚香祝天曰若天不欲復興宋室則大風覆我舟舟遂覆世傑死之

汪繼宗歙人生淳祐間見國祚不競有恢復中原之志福王與昺召見愛之妻以女宋亡自以受國恩不卽死無以見祖宗于地下遂不食而卒

王用龍進賢人宋亡用龍誓不爲異國民後爲元鎮守兵所獲碎斃器廟吮而死

謝君直名枋得號疊山信州弋陽人景定甲子江東漕闈校文發策問權姦誤國趙氏必亡忤賈似道貶興國軍三年遇赦得還元兵南下郡城潰棄家入閩至元二十三年御史程文海承旨留夢炎等交薦累召不赴二十六年春正月福建行省叅知政事魏天佑復被詔旨集守令成將迫促上道臨行以詩別常所往來者曰雪中松柏愈青青扶植綱常在此行天下豈無龔勝潔人間不獨伯夷清義高便覺生堪捨禮重方知死甚輕南人男兒終不屈皇天上帝眼分明夏四月至京師不食死

年六十有四秋八月子定之奉柩歸葬門人誄而題之曰文節先生謝公墓

家鉉翁眉州人宋末知建寧府兼福建轉運副使後簽書樞密院事元兵迫郊鉉翁獨不署降表宋亡旦夕哭泣不食飲者數月成宗卽位放還賜號處士錫賚皆不受羅一理進賢人宋亡謝枋得爲江西招諭使一理偕弟起潛赴義被擒不屈皆腰斬弟臨刑謂一理曰今日得死所矣

文天祥吉水人宋右丞相少保信國公初元張弘範襲執天祥於五坡嶺天祥吞腦子不死至潮陽見弘範左右命之拜天祥不屈厓山旣平弘範謂天祥曰國亡丞相

續文獻通考卷之六十三  
忠孝盡矣能改心以事宋者事大元將不失為宰相也  
天祥泫然出涕曰國亡不能救為人臣者死有餘罪况  
敢逃其死而貳其心乎乃以天祥北去道經吉州痛恨  
不食八日猶生乃復食至燕館人供帳甚盛天祥不寢  
坐達旦遂移兵馬司設卒守之既而丞相孛羅召見天  
祥入長揖欲使跪天祥不屈孛羅怒命囚於獄所作有  
正氣歌已而又召天祥於獄欲用之天祥固辭欲殺之  
不果後以中山狂人之變乃殺之

續文獻通考卷之六十三終

續文獻通考卷之六十四

皇明進士雲間王圻纂輯

節義考 忠臣三

遼

阿果達為遙輦帳詳穩酌古為客省使高清明為勃海詳  
穩海里為天雲軍詳穩聖宗開泰中同蕭排押等與高  
麗戰於茶陀二河遼兵失利阿果達等皆死之

撻烈哥為國舅詳穩蕭打里為宮使聖宗統和四年與宋  
戰于莫州皆死之

撻不野為北路招討使道宗大安九年西北夷磨古斯偽  
降既而乘虛來襲撻不野死之

續文獻通考 卷之六十四 金

胡沙虎完顏部人太祖時從軍為詐降人高永昌所執神色自若罵永昌曰汝叛君逆天今日殺我明日及汝矣罵不絕口死贈遙領節度使

特虎雅撻瀾水人太祖時從軍以死捍遼兵沒于陣皇統間贈明威將軍

粘割韓奴皇統中以仗義將軍護衛招耶律大石降大石憤其不下馬且挾使跪韓奴不屈而死世宗贈昭義大將軍

曹珪徐州人大定四年州人江志作亂珪子弼在鎮中珪謀誅志并弼殺之詔以大義滅親進一官止班用之

溫迪罕蒲觀為兀者群牧使被賊執欲其同反曰吾世受國恩子姪皆仕宦不能從汝而累吾族也賊斃之子孫皆被害

鶴壽鄆王昂子五院部人老和尚率眾招鶴壽同反不從遂與二子俱見殺

訛里也契丹人大定初招諭契丹窩幹不屈節死褒贈納蘭綽赤咸平路猛安人不從契丹括里招後被執斃殺之褒贈

魏全壽州人泰和六年為宋將李爽所執至死罵不絕口鄴陽宗室子為符寶祗候至寧元年為亂臣紇石烈執中所害贈宣武將軍順天軍節度副使



夾谷守中咸平人至寧末爲彰德軍節度使城陷爲下人所執欲其招降平涼守中僞許之至城反其辭交刃殺之贈資善大夫東京留守

王晦高平人有將帥才明昌初累官翰林學士勸農使順州受兵其故部曲王臻者欲說之降晦不從竟就死加贈其官命有司立碑歲致祭焉

石祿元毅咸平路人明昌中官彰德府治中奮力禦敵而死贈武信將軍

伯德梅和尚泰州人正隆時爲崇義軍節度使與敵拒戰而死贈龍虎衛

後以兵入衛中都守定興軍敗而死

高守約字從簡遼陽人宣宗時爲觀州刺史元兵徇河朔不屈而死贈崇義軍節度使謚忠敬

和速嘉安禮字子敬大名路人宣宗時爲泰安州刺史被元兵執或以酒監對安禮曰我刺史何諱爲使跪不屈以戈撞其胷殺之贈泰定軍節度使謚堅貞

王維翰字之翰利州龍山人宣宗時爲定海軍節度使結營自守力窮被執不降死妻姚氏亦同死贈中奉大夫

姚氏芮國夫人謚貞潔

移刺古與涅宣宗時爲安化軍節度使與元兵力戰流矢連中其頰拔去復中其頰死贈安遠大將軍

宋展宛平人宣宗時爲沁南軍節度使元兵至懷州城破  
死之

王祿爲泗州新城提控宣宗時宋人襲泗州祿死之

木甲法心宣宗時守密雲家屬在薊州者爲元兵所得示  
以不降則盡殺法心不顧城破而死贈開府儀同三司  
樞密副使封宿國公同死者咬查刺紉舍十方奴皆贈  
官仍命樹碑以時致祭

高錫字永之宣宗時爲河北東路按察轉運使城破自投  
城下而死

吳僧哥西南路部落人宣宗時以同知太原府事死于元  
兵贈鎮國上將軍順義軍節度使

蒲魯虎宣宗時爲陝州宣撫使元兵取潼關戍卒皆潰蒲

魯虎獨禦戰兵敗死之

完顏訛可爲同州節度使宣宗興定時元兵取同州訛可  
死之

合納蒲刺都守潞州興定中元兵攻潞州刺都力戰死之

贈御史大夫

烏古論德升益都人宣宗時以河東元帥不能完城自縊  
死其姑及妻皆自殺贈翰林學士承旨以奉御俸養其  
幼子兀里偉

張順淄州士伍宣宗時元兵圍淄州行省提控王庭玉將  
兵救之使順往覘爲所執使宣言行省兵敗宜速降順

佯許之至則反其辭臨死曰得爲忠孝鬼足矣贈宣武將軍同知棣州防禦使事有司給養其親任用其子孫郭斌會州將也元兵圍會州城斌驅妻子入一室焚之已而自投火中死

馬驤禹城人宣宗時爲濟陰令爲元兵所執求金曰吾書生何從得是又使跪曰吾膝不能屈欲殺卽殺得爲大金鬼足矣遂死贈朝列大夫泰定軍節度副使

伯德窳哥奚人宣宗時以東勝軍節度使死于元軍

奧屯醜和尚宣宗時以代州經畧使被元兵執不屈死完顏六斤中都人宣宗時以元帥右監軍守潞州與元人力戰而死贈御史大夫

女奚烈幹出宣宗時仕至植州刺史元兵至曰吾曹坐食官祿可忘國家恩乎誓力戰而死爲張提控所害

時茂先密州人紅襖賊據密州時過茂先所居村居民相率迎之茂先獨罵不迎賊執而殺之至死罵不絕詔贈武節將軍同知沂州防禦使

溫廸罕老兒爲同知上京留守事蒲鮮萬奴攻上京其子鉄哥生獲老兒脅之使降不從鉄哥怒亂斫而死贈龍虎衛上將軍婆速兵馬都總管

梁持勝字經甫宣宗時以保大軍節度使守鄜州城破自投崖下死贈特進知延安府事

紇石烈鶴壽河北西路人宣宗時行元帥府于鄜州城破

猶據土山力戰而死謚果勇

蒲察婁室東北路人宣宗時以孟州防禦使救鄜州死之  
贈資德大夫定國軍節度謚襄勇

任福爲沔城縣軍官宣宗時元兵下沔城福死之

馬甫爲潞州都統宣宗時元兵攻潞州甫死之

劉仲亨爲錦州元帥宣宗時元兵徇錦州仲亨死之

汝奚烈資祿咸平府人宣宗時以金安軍節度使救鄜州  
被執不降死贈銀青榮祿大夫中京留守復錄其子

完顏訛出虎爲汾州節度使宣宗時元兵徇汾州訛出虎  
死之

郭用爲平陽提控宣宗時元兵攻平陽用死之

李革及從坦知平陽府事權參知政事行尚書省宣宗時

元兵下平陽革及從坦死之

納合蒲刺爲潞州元帥右監軍王良臣爲都參議官脩起  
居注宣宗時元兵收潞州蒲刺及良臣死之

趙益太原人宣宗時爲太原同知城將破焚其府庫殺妻  
子投其符印于井遂自殺贈銀青榮祿大夫河東北路  
宣撫使求其子孫錄用

侯小叔河東縣人宣宗時以權元帥左都監守河中凡言  
降者皆斬之有表兄張先諷以保妻子侯卽縛先于柱  
而殺之後城破而死下詔褒贈

郭秀爲武州軍事判官宣宗時元兵下武州秀死之

喬天翼爲合河縣令宣宗時元兵下合河天翼死之

烏古論仲溫爲鎮西軍節度使宣宗時元兵下嵐州仲溫死之

王佐字輔之霍州人宣宗時王沁州玉女寨救襄垣中流矢卒贈金吾衛上將軍

黃摑九任臨潢人宣宗時知彰德府元兵至戰沒贈榮祿大夫南京留守仍錄用其子孫

王毅大興人以經義進士累官至東明令貞祐末東圍急毅率民兵願戰者數百人拒守城破率衆抗戰力窮被執縣人王八欲降之毅厲聲曰忠臣不佐二主驅殺者以刀斫其頸不屈而死

烏林荅乞住大名人宣宗時以元帥右都監援中都戰沒贈榮祿大夫參知政事以參政半俸給其家

陀滿斜烈咸平路人宣宗時知彰德府事城破死之高霖東平人官兵部尚書參知政事中都留守兵亂死之

謚文簡

高憲遼東人爲博州防禦判官遼陽城破死于兵粘葛貞宣宗興定二年權元帥守晉安城破貞與府官十餘人皆死之

徒单航宣宗時爲安州刺史元兵大至謂民曰我家兩世駙馬受國恩不可降民曰太守不屈我輩願同死守及城將危航先縊其妻孥謂家人曰我死卽撤屋焚之遂

自縊民同死者甚衆

完顏陳和尚名彛字良佐宣州人宣宗時以忠孝軍統領戰于三峯山敗走鈞州城破殺掠稍定乃出自言曰我忠孝軍陳和尚也我死亂軍中人將謂我負國家今日明白死時欲其降斫足頸折不屈割口吻至耳噴血而呼至死不絕大將義之酌以馬湏祝曰好男子他日再生當令我得之贈鎮南軍節度使塑像褒忠廟勒石紀其忠烈人嘗其精尚書家賦如軍中帶書符其廟於之伯德爲東勝州節度使宣宗時元兵徇東勝伯德不屈死之

移刺阿里合爲霍州刺史宣宗時元兵下好義堡阿里合

死之

楊沃衍朔州人爲北邊屯田小吏後守鈞州元兵使人誘降沃衍拔刀斫之曰我起身微賤蒙國大恩汝欲以此污我耶遂語部曲後事望汴京再拜且哭曰無面目見朝廷惟一死耳卽自縊從死者十餘人

楊敏中淄州人故致仕屯留主簿宣宗時元兵取淄州與判官齊鷹揚郡民張乞驢等募兵備禦城陷率衆巷戰鷹揚戰死敏中乞驢被執不屈而死贈敏中同知橫海軍節度使乞驢同知淄州軍事

完顏承輝宗室也宣宗貞祐元年爲右丞相都元帥元人圍燕京承輝與抹撚盡忠期同死社稷盡忠不從承輝

乃辭家廟召左右司郎中趙思文謂之曰事勢至此惟  
有一死報國耳乃盡出財物給散家人仰藥死

與哥鳳翔人起于群盜人呼曰熱劉後于清化戰死元兵  
酌酒以吊西州耆老語之至為泣下

烏古論黑漢以親軍入仕為唐鄧元帥府把軍官哀宗時  
元兵攻急城中糧盡人相食黑漢殺其愛妾啖士士爭  
殺其妻子黑漢守益堅後為宋軍所獲脅使降不屈死  
馬慶祥字瑞寧淨州人宣宗時守鳳翔命盡工肖其像付  
家人出城外殊死戰矢盡元兵圍之數匝欲降之竟不  
屈而死贈輔國上將軍恒州刺史謚忠愍凡同死者十  
有二人哀宗為立褒忠廟仍錄其孤

陀滿胡土門字子秀策論進士也哀宗正大三年為臨洮  
府總管城破被執誘之降不應使之跪不從以刀亂斫  
其膝頸終不屈遂殺之贈中京留守立像褒忠廟仍錄  
用其子孫

完顏愛申為順德節度使哀宗正大四年元取順德愛申  
死之

草火訛可為權簽樞密院事正大八年元取河中府訛可  
死之

姬汝作字欽之汝陽人哀宗時守汝州力戰而死  
馬肩龍字舜臣宛平人哀宗時同守汝州晝夜二十戰力  
盡乃已肩龍以劔自剄詔各贈官配食褒忠廟

禹顯雁門人哀宗時權元帥府都監守襄垣軍內變城破被擒帥不忍加害既而密遁去將往從上黨公軍復爲追兵所執不屈死

張邦憲秦州人正大中進士爲永固令天興二年避兵徐州被亂兵卓翼所執將驅之北罵曰我進士也朝廷用爲邑長可從汝曹反耶遂遇害

商衡字平叔曹州人哀宗時爲秦藍總帥府經歷官爲元兵所得欲降之不屈望闕瞻拜曰主將無狀亡兵失利臣之罪責亦無所逃但以一死報國耳遂引佩刀自剄木甲脫魯灰上京人哀宗時以元帥屯商州大吉口將潼關兵入援至商山遇雪元兵邀擊之士卒凍餒不戰而潰脫魯灰被執不屈拔佩刀自剄

吳邦傑登州判官也爲元兵所得驅令攻城邦傑曰吾荷國恩詎忍攻吾君之城與之酒食不顧乃被殺

楊達夫字晉卿三原人嘗以進士主鄜縣簿事家居金木詔徙入關爲元游騎所執將褫衣害之達夫大言曰我金國臣子旣爲汝所執不過一死忍袒裸以贖天日耶遂見殺兩山潛伏之民皆曰如此好官他日祠之當作我橫山之神

烏林荅咬住爲防禦使哀宗時元兵薄鄭州咬住死之慶山奴守許州哀宗時許州兵變降元慶山奴死之張若遇攝臨須令哀宗時元兵狗臨湏若遇死之



馮延登字子俊吉州人哀宗時以翰林學士奉國書至金  
金欲誘鳳翔帥不從再三迫誘以刀截去其鬚髯岸然  
不動乃監之豐州後放還權刑部尚書元兵下汴京欲  
擁之北行延登躍城旁井中死

烏古論仲端字子正哀宗時留守汴京數言人死亦易事  
以燕之春來秋去爲比書諭裴滿思忠既畢連飲數杯  
送思忠出門曰此別終天矣卽自經其妻亦從死明日  
崔立以城降

烏古孫奴申字道遠由譯史入官哀宗時以行省左右司  
郎中兼知官省事留汴京居守崔立作變明日同御史  
大夫裴滿阿虎帶自縊于臺中時同死者戶部尚書完

顏玘顏奉御完顏忙哥大睦親府事吾古孫端大理裴  
滿德輝左副點檢完顏阿撒右副點檢溫敦阿里參政  
完顏奴申之子麻因左右司員外郎聶天驥載而

完顏褚兒都喜爲元帥哀宗時元擊大河南岸都喜死之  
蒲察琦字仁卿陽信人哀宗立講議所受陳言文字琦以  
安平都尉與焉崔立變後令改易巾髻琦謂元好問今  
日易巾髻在京人皆可琦獨不可琦一刑部譯史襲先  
兄世爵安忍作此今以一死付公然死則卽死付公一  
言亦剩矣其母夢二人潛伏梁間驚寤琦曰兒意在懸  
梁此鬼已先見母夢母曰兒所處是也卽自縊

蘇椿大名人以元帥守許州元兵至使招降椿卽斬之旣

而城陷不屈被殺

完顏撒合輦爲中京留守哀宗開興元年元圍洛陽撒合輦赴水死

完顏賽不花爲行省右丞相天興二年徐州降于元賽不花死之

強仲爲中都留守天興初元兵取洛陽仲死之

蔡八兒不知所始哀宗未爲忠孝軍元帥哀宗禪位承麟  
宗群臣入賀八兒不拜謂所親曰事至于此有死而已安  
能更事一君遂戰死

毛佺恩州人哀宗遷蔡以佺爲都尉城破自縊時同死事  
有滑州閻忠磁州郝乙河中王阿驢樊喬皆以職宦戰

死

溫敦昌孫皇太后之姪哀宗居蔡以殿前左副點檢潛出  
城巡邏又潛取練江魚以供尚食與元人力戰而死

納坦胡失打前爲御史監察聞蔡州城破慟哭投水而死

完顏忽斜虎爲尚書左丞哀宗天興三年孟珙入蔡州忽  
斜虎死之叅政字木魯小婁室等及軍士五百餘人皆  
從死焉

完顏絳山哀宗之奉御哀宗傳位承麟卽自縊于幽蘭軒  
絳山舉火焚之元兵入衆皆逃避絳山獨不去曰吾君  
終于是吾候火滅收瘞其骨耳兵笑曰汝命不能保能  
瘞而君耶絳山曰人各事其主吾君有天下十餘年身

死社稷忍使其遺骸暴露即吾瘞吾君之後雖寸斬不恨矣其帥奔盩厔稱奇男子聽之絳山乃以弊衾裹餘燼瘞汝水旁再拜號哭將赴汝水死軍士救之得免後不知所終

閻忠滑州人衛王時為開州刺史賽哥叛忠單騎入城縛之出哀宗遷蔡與義軍招撫毛城等同日戰死

畢資倫縉山人守泗州為宋人所執宋人賞其忠憤不撓欲全活之囚于鎮江府獄哀宗自縊宋人告資倫資倫嘆曰吾無望矣容我一祭吾君乃降耳宋人為屠牛羊設祭鎮江南岸資倫祭畢伏地大哭投江而死

吳禹錫利州龍山人歸德受兵禹錫為行院都事經畫守禦一府倚重聞變或勸以微服免不從遇害

郭嶰蝦會州人哀宗時知鳳翔府守節不屈而死

王浩哀宗末為扶溝令民錢大亨等執浩送款于元以有元恩于民不忍加害遣所知勸之降終不聽於是殺之無孑血王簿劉坦尉宋乙並見害棄屍道傍白春徂夏獨浩屍儼然如生且不敢近若有神護者

為河東路兵馬都元帥兼知平陽府後亦為金所執不降置鐵籠中火炙死

新泰人宋石

續文獻通考卷之六十四終

吳玠然咬主目且不與魚犬不煩也其有斬鬚者

血王戰隆吐保宋了並良害棄吳直到日春卧夏圖出

恩于男不恐吹害豈况味憤之劉絲不顯外長殊之無

王武京宗末燕封載令男楚大官等時哉武煥于示以育

得機與會入京宗親映鳳祥初守潛不屈而卒

樂一初尚重開變短博以對則良不孫與害

續文獻通考卷之六十五

皇明進士雲間王圻纂輯

節義考 忠臣四

元

李伯温守賢之孫毅之子也元初知平陽府為金兵所破

伯温拔劍殺家屬投井中以刃植柱刺心而死子守正

為河東路兵馬都元帥兼知平陽府後亦為金所執不

降置鐵籠中火炙死

石珪新泰人宋石守道裔元初為山東諸路都元帥與金

戰馬什被擒蒸殺於市其麾下立社交州祀焉

董俊藁城人金末歸元以功累官左副元帥後圍金主于

續文獻通考

卷之六十五

歸德力戰而死封壽國公謚忠烈

攸哈剌拔都渤海人元初守太原誓與城同存亡遂死于陣

任志潞州人元初統元帥金擒其長子如山招之志親射其子死志後死于武安次子存亦爲金將武仙所殺耶律忒末契丹人元初以河北西路安撫使致仕居真定爲金將武仙所陷因誘其子天祐以趙州降當活汝父母忒末密令人語天祐曰母以我故虧臣節天祐乃殊死戰仙怒盡殺忒末家十八人後天祐亦傷憊卒

伯八兒合丹氏太祖時爲萬戶討脫鐵木兒死焉其子八刺居脫鐵木兒左右謀報父仇力窮被執逼令跪不屬

以鐵搗碎其膝終不跪與弟奚不蘭同被害

合刺普華岳憐帖木兒子也世宗時爲廣東都轉運鹽使護征交趾餉道遇劇賊歐鍾等被執欲奉之爲主不屈而死贈戶部尚書守忠全節功臣謚忠愍

石天應與中人木華黎授以興中府尹從南征臨敵應變捷出如神以功累遷兵馬都元帥屯河中金兵來攻天應力戰死之

綦公直樂安人爲益都勸農官世祖召授領兵荆南等處招討使司事奉旨南伐有功後從伯顏戰洪水山追擊寢遠援兵不至公直與妻俱陷于瑗力戰而死

劉天字裕民大名人元世祖時知河中府爲叛臣阿思

罕兵至河中天孚極力拒守城陷被執斫河水開投水而死事聞贈官謚忠毅

李文為權萬戶世祖中統三年斬縣陷文與千戶張好古死之

呂義故東平權萬戶中統四年以義死王事賜謚貞節

關文興至元中陳吊眼作亂攻漳州文興帥兵與戰死之妻王氏被掠義不受辱自投火中死元統二年事聞贈文興英毅侯妻王氏貞節夫人廟號雙節

鞏彥暉易州人代兄彥榮為百夫長從攻宋次武昌大戰被傷度不免遂投水中敵援之載歸江州不屈而死

攻貴州懷德與戰死之

董文彥為威楚路知事文宗天曆間中慶路守敗孤叛引兵攻威楚文彥死之賜謚莊愍官其子時中為祿豐主簿

褚君實石樓人泰定中官淮東廉訪副使汝穎盜起君實守淮安凡五年經數十百戰人比之張巡後城陷為賊所齮

侯彥直雅州人仕為忠翊校尉副千戶至元間王虎寇州彥直引兵力戰于名山縣二日兵少力弱為賊所擒義不屈罵不絕被害

蕭景茂漳州龍溪人順帝至元間漳寇亂景茂率鄉人立

柵保險堅不可破會旁里有人導之從間道入景茂被  
執賊使拜不屈既欲脅之降景茂大罵賊遂縛之于樹  
剖其肉使自啖嚼且曰我食我肉無若汝賊行將萬段  
狗彘棄不食賊怒絕其舌而死

王伯顏字伯敬濱州霑化人至正九年知福寧州賊自邵  
武間道來逼乃募壯兵五萬與子相馳破之繼賊帥王  
善擁眾壓州西門伯顏與戰被執善次其仍尹此州伯  
顏叱罵不屈遂挺頸受刃頭斷通  
不變復欲官相相亦罵賊死相之  
亦罵賊母子俱死御史余闕以狀  
立廟祀之

如乳暴屍數日

民孳二女被獲

追封太原郡侯命

陳陽盈字子謙以父蔭累官侯官縣尉調泉州府稅課司

副使至正中草寇攻州知州王伯顏檄陽盈率民兵拒  
敵奮不顧身陷于賊帥王善脅之使降陽盈執大義罵  
賊遇害事聞勅贈敦武校尉安溪縣尹旌表其門

張桓字彥威藁城人爲西臺監察御史謝職居雄山縣城  
陷賊素聞公有活人績置公上座脅之使受僞官公唾  
罵之遂縛公妻奴九人至前先殺妾次殺子女及妻每  
殺一人則曰御史若降餘可免公罵如初賊怒拽下殺  
之時至正十一年秋八月賊語曰張御史真鐵漢

星吉順天河西人爲江南行臺御史大夫至正十一年妖  
賊徐真一等起汝穎吉督兵討之屢有戰功後以糧盡

士疲被虜不食九日而死賊義之葬斬之鳳凰山下御

史夔夔請褒其義贈上柱國追封咸寧王謚忠肅

柴肅襄陽總管至正間竹山賊寇襄陽肅等死之

秦不華爲台州路達魯花赤至正中死事追贈江浙平章

謚忠介立廟台州賜額崇節

葉景仁字天德松溪人至正十二年由政和尉陞蒲城尹

奉省檄討政和西里寨寇勝之後深入以援不繼爲賊

所執斷其右膊大罵而死

劉天祐清江人紅巾寇起天祐結好義者謀誅之後爲賊

所執罵不絕口而死

脫脫同知萍鄉州事至正壬辰斬黃紅巾寇起脫脫集義

### 兵拒戰死之

傑列篋回鶻人至正間紅巾亂藩臣檄掌東門之管城管

城陷列篋投井死妻妾子女死者十有一人

汪澤民婺源人致仕禮部尚書居宣州至正十二年斬黃

紅巾彭黨祖構亂其餘孽自徽寇宣城宣城陷澤民被

執不屈死之贈資善大夫江浙等處行中書省左丞上

護軍追封譙國郡公謚文節

江日新歙人至正十二年斬黃兵陷郡日新與其弟舉兵

皆死之各贈以官

伯顏不花的斤字蒼崖畏吾兒氏至正中以江東道廉訪

副使與陳友諒賊黨戰于信州晝夜不息者踰旬城陷



不花的斤自刎其部將蔡誠蔣廣皆不屈死有小民陳受多膂力不花的斤募爲義兵亦痛罵不屈賊焚殺之不花的斤賜謚桓敏

樊執敬字時中鄆城人至正十二年授江浙行省參知政事賊犯餘杭力戰無援賊呼執敬降執敬怒斥之奮刀斫賊因中鎗而墮從僕馳救之亦死贈官賜謚

程擇婺源人爲武昌路學正以平徭蠻有功陞本路教授至正十二年紅巾兵起以府檄起義兵固守城陷死之林夢正字古泉天台人爲溧陽儒學教授賊衆寇溧陽獲其魁張某夢正問曰爾何人應曰我父爲軍千戶紅巾入境逼我父爲帥父以年老令我代夢正痛罵之曰爾

之父祖世爲國家臣子而爾忍爲盜耶既而賊勢復盛竟奪張去下令曰有生得林教授者賞夢正匿他處搜得賊曰前日罵我者非爾耶夢正曰然賊曰降我則伴爾爲元帥夢正曰爾盜也我何爲降再三終不屈縛于樹下解衣冠而殺之

潮海札刺台氏爲靖安縣達魯花赤至正十二年斬黃賊起爲所執殺于富州子民安圖襲父職爲本縣達魯花赤迎戰力竭賊執而副之時縣尹黃紹縣中進士胡斗元並罵賊而死

聶炳字蘊夫江夏人至正十二年知荆門州纔半歲而淮漢賊起陷荆門炳出募兵復之已而斬黃安陸之賊復

續文獻通考 卷之六十五  
來攻晝夜血戰援絕城陷被執炳極口罵不絕賊以刀  
抉其齒盡乃斷左臂而支解之未幾賊陷潛江縣達魯  
花赤明安達爾亦死之

桂完澤永嘉人爲平江管軍鎮撫與妻弟金德同爲賊所  
執縛于樹臨以白刃脅之降金德意未決完澤呼曰金  
舅男子漢即死不可聽賊德曰此言最是因大罵賊怒  
剖二人腹而死

丑閻字時中蒙古氏人至正十二年知安陸州斬賊魯法  
興犯安陸閻拒戰乘勝追之而賊自他門入城中火起  
軍民潰亂閻乃歸服朝服坐公堂賊脅以白刃使下拜  
不屈且怒罵賊酋不忍害明日又逼其從亂閻復叱之

賊以刀斫左臂脅斷而死其妻侯氏亦自縊死贈丑閻

河南行省叅知政事侯氏寧夏郡夫人表曰雙節

郭庸字允中蒙古氏監察御史累轉中書省叅政兼留守  
京師事城破大將召至衆叱之拜庸曰人各爲主死自  
吾分何拜之有遂遇害

梅實宣城人集慶路總管府照磨至正間大兵圍集慶乏  
援乃謂友李端曰事急矣當以死殉國城陷闔門皆死  
馮三湖廣省公使也素不知書湖廣爲寇陷皂隸輩悉起  
爲盜拉三以從三辭曰賊名惡我勿爲賊賊怒將殺之  
三遂唾罵賊乃縛諸十字木昇之以行而刳其肉三益  
罵不止抵江上斷其喉委去妻隨三號泣俯拾刳肉納

布裙中俟賊遠收血骸脫衣裹之大泣投江死

劉濬字濟川興州人至正十三年爲連江縣寧善鄉巡檢與江西賊帥王善屢戰屢勝後中箭墮馬與仲子健俱被執濬戟手大罵賊縛濬階下先斷手一指罵益篤再斫一指亦如之指且盡斫兩腕次及兩足濬色不少變罵猶不絕遂割其喉舌而死健亦以死拒賊義之縱使歛父屍後結死士報仇手斬殺父者張破四并擒善及寇首陳伯祥以獻磔之贈濬福建行省檢校官授健古田縣尹官爲濬立祠致祭

朶里不花字端甫蒙古人至正中拜江西行省叅知政事爲賊金榮所殺罵不絕口妻卜顏氏妾高麗氏皆遇害

野峻台世延子也至正中以四川行省叅政爲賊所害贈

官賜謚

陳君用字子才延平人至正中以權知副都元帥與紅巾賊戰于江中鎗而死贈官賜謚

孛羅帖木兒字國賓高昌人至正中爲襄陽路達魯花赤與賊戰被重創麾其姪馬哈失力使去曰吾以死報國汝無留此馬哈失力泣曰死生從叔父旣而被賊執賊請同爲逆孛羅帖木兒怒罵之遂遇害馬哈失力亦死彭庭堅字允誠瑞安人至正中以功陞同知福建道宣慰使司都元帥鎮邵武屢平賊有功以麾下萬戶岳煥縱卒爲暴欲繩以法岳乘不備詐爲賊兵突入衆皆潰庭

堅獨留不去遇害立祠祀之旁邑亦立祠封忠愍侯

陶起祖銅陵人元末兵起嘗募集義兵官至同知後爲趙軍所執伏義而死

鄧可賢乳源人至正中柳寇圍乳源甚急可賢率峩民并其子弟死守凡兩月糧盡奮身出戰被執與弟七人皆死峩民無一人降者

魏中立字伯時濟南人至正間遷饒州路總管徐壽輝攻饒中立被執以紅衣被其體中立叱之鬚髯盡張賊執歸斬水欲屈其從中立大罵不絕而死

湯自愿餘干人至正間斬賊項普陷饒被執不屈死省憲聞于朝命致祭

李棠卿鄱陽人仕無錫倉使張士誠入無錫被執誘以仕不屈死之贈樂平州判官

劉耕孫字存吾至正十五年官寧國路推官長鎗賊瑣南班等攻城時救兵遠來方疲而城恃有援不爲備賊乃夜四鼓緣堞而上城遂陷耕孫力戰遇害弟陶孫以常寧州儒學正死于常寧子碩以江夏縣魯湖大使起義兵援茶陵亦死之

李齊字公平廣平人爲高郵知府至正初張士誠復攻陷高郵齊被執不屈遇害贈翰林學士追封曹南郡公謚忠烈

盛昭字克明歸德人由儒學官累遷淮南行省照磨遣人

高郵諭張士誠士誠不聽拘諸舟中既而官軍逼高郵士誠授昭以兵使拒官軍昭叱曰吾奉命招諭汝之拘留詔使罪不容斬又欲吾從汝爲賊耶罵不絕口賊怒先剗其臂肉而後磔之

熊義山安鄉人累官至萬戶至正間倪文俊兵至執縣尹張惟和義山保障黃山一縣獲安越二年文俊襲執之逼使速降義山罵不絕口文俊大怒剖其腹而死

王翕宣城管軍百戶至正十五年長鎗叛帥璫南班等攻郡城將陷翕呼弟曰我受國恩遇難當死顧老母在汝等宜出避語訖即殺妻子焚其居自刎而死

文兒只班爲中興元帥至正十五年張士誠將倪文俊復陷中興只班死之

鄭玉字子美歙縣人至正十七年大明兵入徽州守將要致之玉曰吾不得慷慨殺身以勵風俗猶當從容就死以全節義遂夫婦同縊而死

張文貴宣城百戶至正十七年天兵下寧國路守將出降文貴到死妻妾亦自殺

釋家訥爲膠萊守臣至正十七年劉福通遣毛貴攻膠萊州訥死之

王士元字堯佐恩州人至正十七年知磁州賊至州兵悉散士元安坐堂上顧其子致微使避賊子不忍去賊欲縛士元士元奮拳擊賊遂并子害之

金普庵撒里字子仁高昌人至正中以功拜江西行省叅政分省于贛陳友諒來攻城陷自剄謚曰傲哀哈海赤守贛尤有功城陷之日謂賊曰不降者我爾無殺百姓遂見殺

僧住守婺州至正十八年 大明取婺州住及浙東廉訪使楊惠死之

余闕至正間爲淮安宣慰副使分治安慶屹然爲江淮保障陳友諒攻城闕以孤軍血戰自刎墮清水塘中妻子皆赴井死追贈幽國公謚忠宣

余闕合肥人元至順中累官浙東廉訪司僉事分守安慶陳友諒陷安慶闕力戰死之妻耶律氏及子德生女福

童氏自赴井死同時死者故守臣韓建一家皆被害事聞

贈闕淮南行省平章政事謚文忠 本朝謚文宣 命

有司立祠祀之

帖木補化蒙古氏也至正進士遷桐城縣達魯花赤時縣已陷敵補化乃就郡中招集其避地之民諭告切至民樂効勞守帥余闕擢爲都事城陷與闕同死懷寧尹陳道夫亦闕所辟同闕死

張昇建陽人官至江西儒學提舉至正十八年陳友諒據豫章追取諸司印昇乃投其印于井不食而死

劉以忠字恕夫湯陰人至正十八年劉福通侵河朔以忠避地林縣鹿嶺山群盜襲之請以忠爲主擁坐盤石衆

卒邏拜于前以忠曰我書生也不能爲國討賊反附之  
乎遂以頭觸石血流滿面賊度其志終不改刺殺之

于大本字德中密州人爲信州總管被賊執僞主釋其縛  
畀僞印一紐且命以官大本投印于地痛詈之遂遇害  
普顏不花字希古蒙古氏至正十八年經畧江南至建寧  
陳友諒遣將鄧克明來寇而諸將皆遁不花誓與城同  
存亡卒大敗賊後爲山東宣慰使 大明兵壓境城陷  
不花及總管胡濬知院張俊俱死之時普顏不花二弟  
之妻各抱幼子及婢妾溺舍南井死不花妻阿魯具欲  
下而井填咽不可容乃抱子投舍北井其女及妾女孫  
女皆隨溺焉時有申榮者平章山東行省守東昌告父

忠孝不能兩全遂自經

董搏霄字孟起磁州人官山東宣慰使都元帥有疾其功  
者譜于總兵太尉紐的該令搏霄從卜蘭溪同征益都  
搏霄曰我去濟南必失請以弟昂霄代領其衆朝廷從  
之搏霄遂率兵北行至南皮縣魏家庄營壘猶未完而  
毛貴兵至諸將謂搏霄曰賊至當何如霄曰以死報國  
因授劔督兵以戰而賊兵突至執搏霄殺之是日濟南  
陷昂霄亦死事聞追封搏霄魏國公謚忠定昂霄隴西  
郡侯賜謚忠毅

伯顏前江西廉訪僉事至正十八年伯顏謀起兵討賊不  
克而死事聞謚文節

續文獻通考 卷之六十五 三  
彭敬叔爲河北僉憲致仕歸道遇兵亂執之使拜不屈死  
之贈兵部尚書隴西侯

喬彞字仲常晉寧人至正十八年賊襲晉寧城陷彞整衣  
冠聚妻子坐大井上令妻子婢循次投井而已隨之贈  
臨汾縣尹謚純潔時有張巖起字傳霖汾州人以國子  
助教與妻赴井死王佐字元輔晉寧人教授里巷詬賊  
不輟而死吳德新字止善建昌人工醫往寧夏爲賊所  
執誓不從賊乃縛其兩手加白刃頸上迫其畏屈德新  
罵不已乃曳之井上陽欲擠之而德新卽自投井中仰  
罵賊賊射矢貫其頂罵益力賊以長鎗刺之然亦壯其  
志憐其死曰此真丈夫也以土埋井而去

王英字邦傑益都人性剛果有大節以平寇功拜懷遠大  
將軍至正間毛貴陷益都英曰吾老不能報天子尚忍  
食異姓之粟以求生乎遂餓而死

張名德爲般陽總管至正間毛貴攻般陽名德死節贈河  
南行省左丞謚忠襄

張輔爲陵川尹至正間山東寇亂突入陵川逼輔使降輔  
抗節不屈具公服坐廳事爲賊所害

張俊山東行樞密院知院 大明兵攻益都悉力拒守城  
陷携妻子投井死

張士謙樂安人知婺源州事敵兵至踰五十餘日城陷被  
執先戮其妻仍加刃于頸以脅之士謙曰吾爲國死忠



豈畏死耶至死罵詈不絕追封清河郡伯

張祖信爲山東臺幕至正間毛貴入山東祖信被執不屈而死贈河南省員外郎

脫歡簽書樞密院監膠州至正間毛貴陷膠州脫歡力戰死之

神保北庭人至正間爲林州達魯花赤會劉福通兵陷林州神保與民避守蟻尖寨攻急神保懷其所授白麻投崖而死

鄧椿吉水人爲臨江府吏僞漢陷臨江率廬陵義士千百偕萬夫長楊獻與賊大戰三月兵潰投江死

蕭生吉水人爲建州儒學正用辟爲叅謀僞漢陷廬陵叅政金子仁遁去蕭生赴井死

呂震爲懿州總管至正十九年關先生等兵陷遼陽震死之贈河南左丞東平公

張正蒙暨妻韓氏至正十九年紹興兵變夫婦俱縊死女也奴年十七亦投崖而死

姜碩樂安人由相府掾累官禮部員外郎至正二十年奉詔招安陳友諒等賊不從碩大罵遂遇害事聞詔嘉其不徑不竇以偷生惟忠惟孝之在念贈禮部侍郎謚忠烈

劉玄謨爲弋陽知州至正二十一年寇兵逼州玄謨力拒十九日衆皆欲其降大罵曰吾雖死當殺此賊援兵不

續文獻通考 卷之六十五  
至城陷罵賊而死

顏瑜字德潤曲阜人顏子五十七代孫爲鄒及曲陽兩縣教諭至正間田豐起山東瑜携家走鄆城道遇賊爲所執使見主帥瑜罵曰賊何主帥使之寫旗大詬曰我腕可斷豈能寫旗從逆賊以鎗刺之而死妻子皆遇害

樊理翰爲雲南儒學提舉至正二十三年明玉珍寇雲南城陷理翰死之

朶耳爲宣政院使至正二十三年 大明兵取福州朶耳死之

齊郁博興人爲山東西道宣慰司僉事至正中 大明兵取益都齊郁死之贈汝南伯

陳元善龍溪人世以儒名家至正二十七年海虞逃兵作亂渠魁薛陽以元善素行孚于鄉里欲先脅之以爲民望元善罵曰吾所畏者義不畏者死汝賊豈能久生耶與其妻郭氏及三子皆遇害

楊居仁爲開化尹饒兵陷治仗義不屈罵賊而死

迭里彌實字子初回回人初爲漳州路達魯花赤 大明兵下福州興化泉州皆納款迭里彌實仰天嘆曰有死而已及聞招諭使者至乃具公服北面再拜引斧斫其印文又大書手版曰大元臣子卽端坐拔所佩刀刺喉中以死旣死而手猶執刀按膝儼然如生時有獲獨步丁者回回人官僉廣東廉訪使有呂復者爲江西行省

左右司都事皆閒居寓福州而復以行省命攝長樂縣  
尹福州既下二人皆死獲獨步丁兄曰穆魯丁官建康  
曰海魯丁官信州先是亦皆死國難云

栢帖穆爾字君壽蒙古人累遷福建行省郎中 大明兵  
至福州召引妻妾坐樓上謂曰丈夫死國婦人死夫義  
也今城且陷吾必死若等能吾從乎皆應曰有死而已  
縊而死者六人有十歲女度其不能自死給之拜卽挈  
囊米壓之死僅匿三歲兒以全宗祀迨兵入城卽舉燈  
自燃死

陳端孫字伯都登武舉首選出鎮福清時陳友定勒兵侵  
州境端孫率衆拒之中流矢墜馬被執友定脅之使從  
端孫憤罵曰我家三世事元今從汝反耶友定怒殺之  
其妻孫氏抱幼女投井死

卜顏帖木兒爲知樞密事至正二十八年 大明兵至通  
州帖木兒力戰死之八月克燕京淮王帖木兒不華丞  
相慶童左丞丁敬可大都路總管郭允中皆死之

黃復圭安仁人至正兵起圭陷賊庭爲詩寫志賊怒將剖  
其腹圭曰腹可剖赤心不可剖遂死之

鐵木兒不花以副都元帥鎮婺源時所在寇亂戰無虛日  
戊戌春敵兵東下夫人披甲突陣而前謂元帥曰事至  
此有死無二督戰益力夫婦俱死

高文鼎爲廣東元帥至正間三山寇攻廣城文鼎力拒幾

續文獻通考 卷之六十五  
一年援兵不至城陷遂自刎一家皆死

卜里牙敦北庭人至正中爲山南廉訪使寇犯中興與戰被執不屈而死明日中興判官上都復與戰而東門失守倉皇反鬪力屈被執使降上都大罵賊怒刳其腹剖其肉而死

塔不台字彥暉不知何所人至正中爲襄陽錄事同達魯花赤餉魏王軍于汝亳俱爲賊執魏王拜乞活塔不台以足蹴曰猶欲活乎賊屈其拜塔不台拒而詬之且與縛者角遂支解

韓因字可宗汴梁人至正中應詔授唐州判官招群盜降賊黨止因于外納詔不讀詰問再三因荅以恩宥寬大禍福所係甚切不聽乃縱因歸報因出乘馬周賊屯大言曰汝輩好百姓何不出降歸田而甘從逆賊賊渠追因寸割之

卞琛大名人至正中以國子生丁母憂治農于家鄰郡盜起來標掠琛與從子小十等協謀統丁壯擊賊勢不敵爲賊所執罵賊死之

趙璉字伯器潁川人宏偉之孫也至正中淮南江北行省叅知政事爲張士誠所執瞋目大罵而死弟琬字德仲仕至台州路總管至正二十七年方國瑛以舟挾琬至黃巖琬潛登白龍輿舍于民家絕粒不食七日而死

孫搗字士謙曹州人至正初進士授濟寧路錄事張士誠

以高郵叛使爲副烏馬兒招降士誠拘之肆其凌辱搗  
不恤也後謀復高郵事泄罵聲不絕竟爲所害追封南  
郡公謚忠烈厚恤其孤

布景龍新都人舉進士授益涼州同知時李頗驢來寇舉  
義兵拒之力戰終日矢盡而死

石普字元周徐州人至正中以樞密院都事從長官守淮  
安欲取高郵城而忌嫉者多不得盡行其志遂爲賊鎗  
所中猶手握鎗斫賊賊攢鎗以刺與從者皆力戰死之  
周鐘字以聲瀏陽州人至正中爲四川行省儒學提舉便  
道還家無何盜至欲推鐘爲主鐘瞠目厲聲大罵賊乃  
殺之時同縣有謝一魯字至道嘗舉進士爲石林書院

山長賊陷潭州爲所縛罵賊甚厲舉家咸遇害

姜天祐吉水人至正間盜起與賊力戰賊勢大盛竟死于  
賊雖死罵不絕口

李鉉字伯昇衛縣人至正間兄鈞字伯衡者累功至懷遠  
大將軍郢復上萬戶府副萬戶討寨寇于清流而歿鉉  
襲職守延平與寨寇戰于政和泗州橋弗克遂死之事  
聞追贈鎮國上將軍江東道都元帥護軍隴西郡侯

樊復字明仲進賢人至正間寇攻北山與弟文仲姪用行  
死之贈明仲進賢尹文仲臨川丞用行崇仁簿

雷燦鄉貢進士至正中閩中亂燦起兵助王師死之贈汀  
州路上杭縣主簿

納速刺丁字士瞻大名人爲淮東廉訪司書吏至正間李璉入據興化納速刺丁力戰不勝與其三子寶童等皆死之贈淮東元帥府經歷

陳無吝永豐人值兵亂叛寇強之從無吝曰相從可矣乞與我紙筆乃大書一詩與寇寇怒拔其舌剝其腹含糊罵不絕口而死

韓心淵武安人以文學徵入國子監至正間任衡水縣尹以德化民蝗不入境調真定縣尹會掃地王作亂心淵與子拒守城陷父子俱死之

張遠永豐人元季盜起汴陽所過殺掠遠與友羅惟遠謀督郡兵禦寇寇知其謀被執俱不屈死之

許則祖樂平人至正間亂兵四起則祖倡義兵恢復德興縣後屢戰勝一日追賊馬陷泥中遇害謚忠顯

楊本巖廬陵人白鹿書院山長元季兵起至吉本巖率民兵保障遷廬陵王簿往捕東固寇盜乘勢深入本巖死之子節聞父死力與寇敵亦死

閔本字宗先河內人始爲御史臺掾五轉爲吏部尚書移刑工二部皆以能稱嘗上章乞謝事不允詔授集賢侍講學士大明兵薄京城乃北向再拜大書其職銜姓名于壁與妻程氏及二女皆縊死

邢飛翰霍州人以兩淮鹽運司同知致仕元末兵亂被執不屈而死追封工部尚書謚忠義

馮文舉什邡人舉進士為雲南儒學正提舉 大明兵攻雲南文舉謂妻馬氏曰我元進士蒙厚恩今軍至有死無二汝光州馬中丞子孫其從之乎馬氏曰官人既去生亦何益遂皆自縊

胡濬為益都路總管 大明兵攻其城自縊死時山東宣慰副使于德文僉山東宣慰司事齊都皆死之

拜任字聞善康里人為太子司經 大明兵至赴井而死王遜志歷官監察御史出為江西廉訪副使召簽太常禮院元末京城不守公卿爭出降遜志獨家居衣冠而坐其友王翼來告曰 新朝寬大盍出詣官自言狀遜志斥之曰君既自不忠又誘人為不義耶即日投井死

趙弘毅字仁卿晉州人為國史編脩官 大明兵入城弘毅嘆曰我今但有一死報國耳乃與妻解氏皆自縊其子恭為中書管勾亦與妻訣曰吾父母俱死尚敢愛生乎遂公服北面再拜縊死

黃暉字殷士金谿人仕至翰林待制兼國子編脩京城既破暉赴井死

孔會心新淦人元末守臣不屈赴水死贈叅軍都錄事陳祖仁字子山汴人至正初進士第一官翰林學士除叅知政事及順帝北遁祖仁死焉時年五十有五

朱春元末為三原尹洪武二年 天兵克城春與妻俱投崖死

王翰字用文廬州人任福建江西行省郎中後表授潮州  
總管元亡屏居永福山中 洪武中或上書薦之 命  
下乃嘆曰女可更適哉遂爲詩別其友卽自引決

吳訥休寧人至正末以召授建德路判官兼民兵萬戶與  
元帥李克魯攻城復之丁酉 天兵臨郡訥戰敗不屈  
自刎而死

潘炎字光大扶溝人舉進士再遷襄城縣尹免官歸賊將  
劉太保陷扶溝遣人辟之爲學士炎罵曰我豈從賊者  
卽以首觸庭柱而死

高傳字起巖謙曾孫爲林州團練萬戶赴調遇盜邏卒且  
戰且行盜率大衆突擊傳疋馬挾勁弓射無不中盜懼  
不敢前援兵不至盜復合攻誘使降傳厲聲大罵力戰  
而死

董成夫以軍功授察罕腦兒宣慰使司宣慰使胡寇犯邊  
没于王事贈中大夫樞密院副使謚忠烈命配食廟庭  
羅次炳廬陵秀川人以征連爲寇所敗被擒備極慘酷竟  
不屈而死贈番禺縣主簿

馬哈麻回回人尉政和夷兵入寇馬哈麻率鄉兵拒戰弗  
利被執瞑目罵賊賊怒剖其腹腸出委地猶罵不絕口  
昔里吉思爲鳳翔兵馬判官死國事贈輔國上將軍恒州  
刺史廟號褒忠

張鳳儀紹州路經歷領孤軍追賊兵潰不屈死子萬里獲



賊首張韶卿剖胷劈肝生啖之尋補父官亦死于贛寇  
李宗可有勇略善禦余闕嘗以兄女妻之以州判官權義  
兵萬戶統新軍守水砦前後多戰功城破人勸之降怒  
曰元帥平日遇我厚我負元帥異日何以見于地下驅  
其家屬盡殺之據胡床縱飲至醉自刎

楊樸字文素河南人早以文學得推擇爲吏官至滁州全  
椒縣尹盜入城樸度必死盡殺其妻女朝服坐堂上盜  
欲降之樸指妻女示曰我已戕吾屬政欲死官守耳乃  
連唾之賊繫之倒懸樹上而割其肉至盡猶大罵不絕  
毛鐸南昌人署爲富州學正時土賊李明道據州治脅爲  
從事鐸罵不絕遂遇害

祝興可寧州人世業儒與寇吳娘子等戰敗被執罵不絕  
口而死

堵簡金壇人元末平章慶童領兵復松江簡爲參謀兵敗  
爲賊所擒欲留用之不屈而死

喜同河西人調南陽縣達魯花赤賊陷南陽突圍而死妻  
邢氏聞同死帥家僮數人出走遇賊奪刀斫之且罵且  
前亦見殺一家死者二十餘人

陳新泰和人以新淦州判居家監州達正道聞其賢辟守  
州之東境寇至援少食盡被執抗節不屈死之

李廉字子敬安福人知信豐時兵起父子俱死于賊邑人  
立雙節祠祀之

朴賽因不花字德中合台人爲中書政事兵至被執請速死殺之

張庸字存中溫州人爲刑部尚書仍領房山團結兵至寨民李世傑執庸出降不屈而死

丁好禮字敬可真定蠡州人官中書平章政事留守京師天兵至不肯謁大將軍昇至齊化門抗辭不屈而死

牛富霍丘人勇而知義爲待衛馬軍司統制戍襄陽移守樊城累戰不少郟城破率死士百人巷戰遇民居燒絕街道以頭觸柱赴火死贈靜江軍節度謚忠烈裨將王福曰將軍死國事吾豈宜獨生亦赴火死

李補州人父守中爲元工部尚書泰定中以明經魁累

官宣文閣監書博士兼經筵官數與勸講至正中江南北寇起出守江州路總管捍賊有功詔爲行省叅政賊大至城陷巷戰叱曰殺我無殺百姓與從子秉昭皆罵賊而死謚忠文兄冕居穎亦死于賊

曹彥可亳州人至正間妖賊起里中皆不知書者群趨彥可家以刀斧逼之寫旗彥可唾曰我儒者知有君父寧死耳豈爲汝寫旗者耶遂遇害事聞謚節愍

趙觀光鄞人以博士弟子員得推擇試吏奉化州尋遷昌國至正十年黃岩寇起昌國孤懸觀光招諭有方不擾事集明年寇衆數倍力不支遂死焉

郭嘉開州濮陽人祖昂父惠俱以戰功顯嘉有大志舉泰

定進士累官禮部員外郎至正十八年遼陽騷動特授  
廣寧路總管既至賊勢日張孤城無援賊遣使脅之降  
嘉殺其使開門督戰力竭死之詔謚忠烈

周宏遷安人元時爲無極寧昌昌黎三縣尹在昌黎時程  
思忠作亂宏率其民赴永平城拒守城陷被執宏不屈  
七日不食罵不絕口而死

福壽江南行臺御史大夫 本朝兵圍集慶福壽數督兵  
出戰城破有司皆奔潰或勸之去福壽曰吾爲國家重  
臣城存則生城破則死尚安往哉遂遇害

胡善至正間爲松江府學訓導苗賊陷松江欲毀孔廟善  
罵賊遂被害初善聞賊至卽以死節自誓題詩于壁曰  
領機來司教臨危要致身

劉溶武進縣尹至正末寇兵陷常州官軍潰散溶獨率民  
兵戰于葛橋南死之

石林宜孫元副都元帥守處州 本朝獲其弟及母以書  
招宜孫不至遁入建寧復出與 王師戰敗走死于桃  
坑 朝廷嘉其盡忠遣使諭祭州民立祠祀之

俞述祖象山人累官翰林國史院編脩出爲沔陽府推官  
至正中蘄黃賊迫州境述祖以民兵捍禦兵力不支城  
陷爲賊所執械至僞主徐壽輝所誘使降述祖罵不輟  
賊怒支解之贈禮部郎中象山縣男

楊乘字文載濱州人負氣博涉經史累官浙省員外郎至

續文獻通考卷之六十五  
正壬辰杭州陷非罪被黜依青龍章元澤以居丙申松  
江陷或傳張氏將起乘笑曰吾豈事二姓使果至乘知  
不免以家事屬章具禮享先祠畢設飲起行後圃中顧  
西日晴好慨然曰晚節如是足矣處置家事如平日夜  
分就寢遂自縊遺書言死生如晝夜不足介意且以得  
全臣節爲快云

續文獻通考卷之六十五終

續文獻通考卷之六十六

皇明進士雲間王圻纂輯

節義考 忠臣五

皇明洪武死事諸臣

花雲懷遠人洪武庚子閏五月僞漢陳友諒陷太平雲爲  
行樞密院判被縛雲奮身大呼縛盡裂奪刀殺賊五六  
人賊衆執雲縛於舟檣射之雲罵賊至死不變

張德勝合肥人洪武初陳友諒襲金陵戰死追封蔡國公  
謚忠毅

耿再成五河人洪武初以院判爲苗將李祐之賀仁德等  
所獲罵賊被害

續文獻通考

卷之六十六

三六十五

趙德勝洪武初以平章爲陳友諒圍南昌效死時知府葉琛皆以守城死千戶張子明軍士捨命王以使事死

韓成虹縣人洪武初以爲帳前總制都指揮時高廟及陳友諒大戰于鄱陽湖事急成假高廟冠服赴水死

賊遂退時戰死者樞密院判丁普郎院判張志雄總軍元帥宋貴陳兆先副元帥俞永昌文貴王勝李信萬戶

程國勝千戶姜潤鎮撫曹信等凡三十六人

俞通海吳元年爲平章征張士誠中流矢卒

康茂才吳三年從征漢中戰死  
廖永安吳三年爲平章征姑蘇以守節死時指揮茅成亦攻張士誠于姑蘇婁門左脅中箭死

漢真洪武十年征高麗被執不屈死之

孫興祖洪武三年兵次三不刺川遇胡兵力戰死于五郎口

曹良臣洪武中封宣寧侯五年六月追虜至土刺河戰死時指揮周顯常榮張耀俱戰歿

章存道洪武中指揮五年七月遇虜于斷頭山戰死

濮英中軍都督僉事洪武二十年殿大軍還道爲虜所執自剖腹而死

黃政洪武中僉都御史二十二年五月從征雲南還次普安遇寇與其子琬皆死之

王鼎儀真人趙忠之養子忠戰沒襲其職復姓王守太平

陳友諒攻太平力戰死之追封太原侯

朱顯忠如臯人嘗為張士誠將守松江洪武初以城降從征有功授濠梁衛指揮僉事調守文州會西寇攻城顯忠力戰死贈鎮國將軍都指揮使

周顯合肥人陞驍騎左衛指揮洪武中從副將軍李文忠進兵阿魯渾河與虜戰沒迎柩賜葬

徐明合肥人國初為百戶陳友諒攻洪都之新城門從指揮薛顯開門突戰被執死之追封合肥男

桑世傑無為人為樞密院判攻張士誠奮戈誓必克其城躍馬陷陣遂死之追封永義侯

王心當塗人天兵克衢州命兼總制及胡大海為行

省參政愷為郎中吳將呂珍決諸暨堰水灌城大海奪

堰水灌珍珍勢蹙誓解兵愷曰彼狡謀勿聽大海不忍食言竟引還珍果敗盟大海及愷俱被害追封愷當塗

縣男

王禕義烏人累官至翰林待制兼國史編修奉命使雲

南為梁王杞都所害正統間贈翰林學士謚忠文

胡深龍泉人本朝師至處州即迎見曰吾所以為此者欲郡邑之民安耳召至京擢浙東郎中總制處州以征福建陳友定遇害追封縉雲伯

葉琛麗水人歸附本朝授管田司僉事守洪都寇陷城琛遇害追封南陽郡侯

續文獻通考 卷之六十六  
劉廣羅田人洪武中以軍功爲指揮僉事守永平胡騎入  
寇廣率四十餘騎與遇于城北方戰死之事聞 賜其  
家楮幣以葬

劉林涼州衛百戶衛之西北五里有寶融臺洪武初土官  
也先帖木兒叛涼州境林力戰死土臺旁 上嘉其忠  
遣祭臺下人遂改名劉林臺

關敏南海人 本朝師下全城歸附授巡檢後爲餘寇攻  
陷死之舉家二十口皆被害事聞贈兵馬副指揮 命  
有司立廟歲祭

牟魯青州府莒州同知洪武初青州民孫古朴等聚衆爲  
亂襲莒州執魯欲脅其降魯叱曰今民皆安業汝輩何

爲自取夷戮卽悔過自新猶可轉禍爲福不然官軍至  
汝輩寧有遺種乎我守土臣有死而已所可惜者良民  
也賊未敢加害擁至城南鄒家庄魯大罵賊遂殺之事  
聞 命厚恤其家

張文煥洪武中爲白洋鎮巡檢與胡寇戰死其妻聞之亦  
同日死一子貧不能自存召養于京給以父俸

鄧瑜洪武間濟南衛指揮同知將率軍士從征囑其妻曰  
我爲人臣當盡死節汝爲人婦能盡貞節乎胡氏許諾  
瑜竟歿于陣胡氏亦守節不渝旌表

曾萬中吉水人元季爲千夫長江右大亂萬中與弟粹中  
保障鄉里歸 本朝還守吉安兵至走京師乞援授萬

續文獻通考 卷之六十六  
中江省叅知政事弟粹中親軍指揮使後城陷兄弟皆戰死

于光都昌人從 本朝征九江戰鄱陽降武昌皆有功累官鷹揚衛指揮使移守鞏州王保保襲蘭州光帥兵往援猝遇敵戰敗被執使呼蘭州降光大呼曰公等堅守大軍至矣敵怒遂遇害 詔配享功臣廟

許瑗樂平人會試不第放浪吳越間 本朝初求賢瑗與宋濂同赴召奏對稱 旨授博士留帷幄中叅預謀議尋 命知太平府瑗至勵士卒修城池撫黎庶陳友諒攻太平拒守彌月城陷被執不屈死之追封高陽郡侯張子明 國初爲千戶從大將守洪都陳友諒來攻子明

潛出請京師請援兵既還爲友諒所獲使誘城降子明僞許之至城下大呼曰大軍且至宜固守以待友諒怒殺之事聞追封忠節侯

孫炎句容人長身跛一足博學善辯論長于歌詩 本朝初建請延攬英才以圖大業從征浙東以功授處州總制後爲賊執脅使降炎大罵不屈賊怒拔刀叱解衣炎曰此紫綺裘 君所賜者我當服之以死遂被害追封丹陽男

皇甫斌壽州人任遼海衛指揮同知爲人勇有智畧遇警急不避險艱身先士卒適虜寇犯邊領軍禦之至密城東峪與寇遇交戰自旦及晡斌氣愈銳戰愈力以矢盡



死子弼從戰以身衛父亦死事聞 譔褒恤之

建文死事諸臣

郭資建文元年秋七月癸酉 成祖兵起布政郭資都指揮張信謝貴侍郎張昺長史葛誠伴讀余逢辰俱不屈死之

莊得建文初爲都指揮隸宋忠麾下懷來之敗惟一軍獲全盛庸戰夾河得力戰助庸斬譚淵已而北兵乘暮掩擊得力戰以死

陳質建文初充叅將守大同靖難兵至懷來以師助宋忠忠敗退守大同後被執不屈死

楚智洪武中都指揮建文初從李景隆禦靖難兵死于夾

河之役

皂旗張係都指揮力挽千斤建文中禦北兵轉戰山東屢有俘馘至夾河力戰死猶執皂旗不仆軍中皆異之

崇剛揚州衛指揮使靖難兵至城下悉力固守爲城中懷貳心者所縛以不屈死

宋瑄鄆國公宋晟子也建文中以指揮禦北兵有功靈壁之戰躍馬先登斬首數級已酉諸營兵敗瑄尤格鬪力屈死之

曾濬薊州衛鎮撫建文中與馬宣守州城靖難兵攻之不克爲張玉所執不屈死

姚善安陸人洪武末守蘇州時稱大治爲列郡最靖難兵

至抗大義以死

練子寧新淦人洪武乙丑對 大廷極言 朝失無忌避

太祖嘉之擢第二自少以名節自砥礪建文初拜吏部侍郎多所建白尋改都御史靖難兵起 廷斥李景隆賣國秘謀後以不屈族誅姻戚被逮論死者百五十 一人戍遠方者數百人

鐵鉉鄧州人初爲五軍斷事奏對詳明 太祖嘉之每法司有疑獄久不能決者屬鉉片時而剖尋擢山東叅政靖難兵至城圍月餘不下每以計窘 文皇知不能克乃棄去後 登極擒至令一顧不可得去其耳鼻亦不顧碎分其體死尚厲聲喃喃不絕

方孝孺寧海人讀書務精思力踐擔荷綱常羽儀斯文士

類推服建文君倚重之靖難兵入以衰絰哭 禁掖屬

草 詔抗拒不從被戮夷三族死者八百四十七人時

溧水人刑部尚書魏澤謫寧海典史悉力保護以故方

氏有遺育謝文肅公謂孫枝一葉澤之力也後過孝孺

故居爲詩悲悼云笳輿衝雨過侯城撫景令人感慨生

黃鳥向人空百轉青猿墮淚只三聲山中自可全高節

天下難居是盛名却憶令威千載後重歸華表不勝情

高巍遼州人宕軼負氣建文初藩釁未作疏論時政借

漢爲喻欲定經制極數千餘言及靖難兵起願使燕軍

上書亦極數千餘言陳說大義慷慨不顧危禍書再上

不報 文皇臨御自縊驛舍死

黃子澄分宜人少務學有俊聲建文初爲太常卿諸藩不靖澄與本兵協圖靖難師起遣將調兵多出指畫及大將李景隆敗奔澄哭諫當特誅不聽已而徐凱盛庸相繼敗澄拊膺大慟曰大事去矣後以北櫛攻急澄借謫南徼以圖募兵 文皇踐祚族誅一子易姓田奔咸寧齊秦溧水人建文中爲兵部尚書初 太祖召問邊將姓名泰歷數無遺又欲考諸圖籍出袖中手冊甚悉 太祖大漸將傳位建文泰預受 顧命靖難兵起泰戮力竭心嗣君惟召學士輩討論周官法度處 便殿弄柔翰事遂不可支泰竟族誅

景清真寧人氣倜儻擔負大節民有女爲妖所憑清館其家書景清在此四字粘其戶妖竟滅 文皇御極死事者甚多公爲都御史獨晏然侍朝人以其素少之一日早朝星者奏文曲犯帝座甚急 文皇意固疑清及見清着緋衣遂檢之得所帶劍不屈而死

周是修建文中爲紀善博學富著述孝友忠信非義不取靖難兵起陳論大計及指用事者誤國衆共讓挫之屹不爲動 文皇師駐金川門 宮中悉自焚乃留書其家別其友江仲執解縉胡廣蕭執楊士奇付以後事入應天府學自縊死

暴昭山西潞州人爲北平叅政時防藩府甚嚴遷刑部侍

紀元虞文元 卷之六十六 四十四 京  
郎克北平採訪事甫至境聞變亟歸以聞請預爲備建  
文元年設平燕布政司於真定陞昭刑部尚書掌司事  
平安諸兵敗召歸京師靖難兵入城出亡被執見 成  
祖抗罵不屈去齒截手足罵不絕口至斷頸乃已

侯泰順德南和人累官至刑部尚書北兵起泰督餉山東  
濟寧不守輜重船沒還京建文四年又出淮安總軍餉  
得便宜行事京師告急泰還至高郵被執下獄是年七  
月十日死之弟敬祖子玘皆死籍其家幼子京兒永樂  
九年猶繫錦衣獄

卓敬戶部侍郎建文初 燕王來朝敬密奏裁抑 宗藩  
畧曰北平者強幹之地金元所由興也宜徙 燕封南

昌以絕禍本建文君覽奏大驚語敬曰 燕王骨肉至

親卿何得此言曰楊廣隋文非父子耶建文君默然事

竟寢卓嘗抑姚廣孝 成祖執敬欲殺之而憐其才曰

敬欲徙朕內地建文若聽其言則干戈息矣廣孝曰不

然南昌地居下流金陵加兵特囊底探物耳使敬言用

上豈有今日哉 上乃殺敬敬臨刑從容嘆曰變起

宗親畧無經畫死有餘罪神色凜然經日如生夷三族

胡子昭刑部左侍郎建文四年九月死臨刑詩曰兩間正

氣歸泉壤一點丹心在帝鄉時年四十一

郭任戶部侍郎調兵食北兵入金川門任不屈而死

盧迥戶部侍郎靖難後被縛不屈臨刑長謳而死聞者悲

之

黃魁禮部侍郎靖難初不屈死之

茅大方泰興人建文元年擢右副都御史北兵起遺詩淮南守將梅殷云幽燕消息近如何聞道將軍志不磨縱有火龍翻地軸莫教鐵騎過天河關中事業蕭丞相塞上功勳馬伏波老我不才無補報西風一度一悲歌四年八月被執死之

周璿諸城人建文初以神策衛經歷言事擢左僉都御史靖難後不屈死之妻子沒官

司中洪武三十年擢左僉都御史建文時死事

推與民出淮西至靈璧會何福戰敗被執與陳性善同死一曰名與明

胡閏鄱陽人建文中爲大理少卿靖難兵起數與齊黃議軍國事壬午七月不屈死之籍其家

盧原質寧海人母方孝孺姑也任太常少卿事建文君屢有建白靖難後召見不屈死之弟原朴論死族其家

陳繼之莆田人戶科給事中北兵起建白指斥徐增壽陰謀北兵入城不屈而死

韓永西安人戶科給事中靖難後杜門不出召入見不屈就死

戴德彝奉化人左拾遺北兵起與方黃畫兵事靖難後不

屈死

高翔朝邑人監察御史靖難後召翔翔服喪服入見大哭語又不遜遂族翔沒其產諸給高氏產者皆加稅曰令世世罵翔也

王度歸善人監察御史北兵南下勅度勞軍徐州北還鳳陽失守方孝孺與度書誓死社稷四年七月坐奸黨誅戍賀州語不遜坐死夷其族

甘霖懷寧人舉鄉貢擢監察御史靖難師起被執死之謝昇沛縣人建文時為御史練兵給餉靖難後不屈死葉希賢監察御史松陽人靖難後坐逆黨死

董庸監察御史倡諸御史劾將校懷二心不力戰者輒彈

劾之靖難後為衆所持謂庸逆黨論死

王玘蘇州人監察御史永樂時以匿革除奸黨子孫被誅巨敬平涼人戶部主事靖難後被逮責問不屈死之夷其族

宋徵宗人府經歷靖難後縛至不屈死并殺其妻子

黃彥清國子博士以在駙馬都尉梅殷軍中私謚建文君坐死

李文敏蔚州人永樂初以奸黨誅

湯宗為北平按察僉事上言北平按察使陳瑛受王府金錢有異謀逮瑛謫戍廣西靖難後瑛召還窮治建文諸臣多坐夷滅宗亦論死

葉惠仲臨海人建文初克史官永樂元年二月二十二日  
以坐修實錄時書靖難事爲逆黨論死籍其家

陳彥回莆田人徽州知府北兵至江上彥回募義勇入援  
事平被繫爭以大義而死籍其家

程通績溪人遼府左長史建文君遣人至荊州通上防禦  
北兵數千言 成祖即位術士紀綱爲錦衣衛指揮使  
乘間言通曩有封事指斥遂械通至京論死

耿璿長興侯炳文子尚 懿文太子長女江都郡主爲駙  
馬都尉掌前府事建文君遜去璿杜門稱疾竟坐罪死

耿獻長興侯仲子官至後軍都督僉事楊文守遼東獻數  
詩攻永平以動北平文不聽靖難後獻論死

張倫河北諸衛指揮建文元年十二月薊州衛官起兵攻  
北平不克而死倫聞之發憤合兩衛官率兵南奔結盟

報國初從李景隆已而從盛庸並有功靖難後死之  
王資以指揮從偏將防守淮北靈壁之役率步卒護軍餉

諸將兵敗被執遣還京遂走鳳陽靖難後追罪廢死  
倪諒燕山左護衛千戶上變告逮 燕府官校于諒周鐸

等皆伏誅沒產靖難後諒死之  
周拱元沅州人錦衣所鎮撫軍前差遣占候輒中主將令

引步兵防餉舟靖難後死之  
陳思賢茂名人漳州府學教授靖難 詔至慟哭曰明倫

之義正在今日遂堅臥不出迎率其徒伍性原陳應宗  
續文獻通考 卷之六十六

林珏鄒君默曾廷瑞呂賢卽明倫堂爲舊君位哭臨如  
禮郡人執送京師思賢暨六生成以身殉

徐輝祖中山王長子魏國公北兵至江上輝祖及開國公  
常昇分道出師禦戰 成祖入金川門羣臣勸進獨輝  
祖不屈 成祖親召問嘿不應下吏令自招罪操筆惟  
書其父開國功及券詞子孫得免死耳 上大怒削爵  
秩勒罷尋下獄卒

劉瑞南昌人建文二年進士與鄉人王高同年同爲大理  
寺左寺丞坐縱方孝孺息樹陰俱劓鼻而死

鄭公智寧海人建文初從孝孺至京舉賢良爲監察御史  
靖難後坐方黨論死

鄭居貞其先徽州人河南試左叅政永樂初坐方黨死

林嘉猷寧海人陝西按察僉事嘗被 成祖召居燕邸最

久知三郡王素傾世子以告孝孺孝孺言之建文君遣  
錦衣千戶張安持書詣燕許世子王燕燕內使黃儼因  
間世子計且得行世子竟先發事遂洩靖難後坐方黨  
逮至京建文四年九月死

黃希范爲徽州知府北兵起大修武備金川門失守素服  
不治事後坐與程通善嘗共議條上防禦策爲錦衣邏  
卒捕去論死籍其家

廖鏞冀人歷官至都督建文中與議兵事時宿衛 殿庭  
靖難後 成祖以廖侯兩子鏞與銘嘗受學方孝孺令



召之孝孺怒曰汝讀幾年書還不識箇是字兩子復命  
上怒令收孝孺族誅之廖兩子拾遺骸葬聚寶門外  
山上甫畢廖氏見收兩子逃去永樂元年四月錦衣衛  
奏獲鏞送刑部論死

黃觀貴池人禮部侍中掌尚寶司事與方齊並見信用北  
兵起觀草詔極其詆斥建文四年觀奉詔募兵安慶且  
督諸郡勤王至李陽河聞建文君遜位衣冠號泣東向  
再拜自沈于羅刹磯下

廖昇襄陽人太常少卿聞茹瑄等龍潭還慟哭與家人訣  
自經死

王叔英黃巖人翰林修撰北兵至淮上游兵逼江干建文  
君遣使四出叔英募兵廣德聞建文君遜位慟哭會齊  
泰奔叔英曰泰二心矣令執之泰至告之故乃相抱慟  
哭與泰圖後舉知事不可爲乃沐浴衣冠書絕命詞藏  
裾間自經於玄妙觀銀杏樹下詞曰人生穹壤間忠孝  
貴克全嗟余事君父自省多過愆有志未及竟竒疾忽  
見纏肥甘空在案對之不能嚙意者造化神有命歸九  
泉嘗念夷與齊餓死首陽巔周粟豈不佳所見良獨偏  
高蹤邈難繼偶爾無足傳千秋史官筆慎勿稱希賢又  
題其案曰生旣久矣未有補於當時死亦徒然庶無慚  
於後世

王良祥符人歷官刑部左侍郎建文三年間燕國人罪從

續文獻通考卷之六十一  
未減遷浙江肅政按察使至浙江謁岳鄂王墓誓曰苟  
愧武穆非人也建文君遜位大慟九月 詔召良良執  
使者將斬以狗爲衆劫去良乃集諸司印于私第嗟嘆  
者久之妻問故曰我分應死未知所以處汝耳妻曰我  
何難遂餽良食抱其子歛歛如屬置其子池旁自投池  
死良殮妻畢卽列薪於戶寫遺囑付家人令妾抱幼子  
以存宗祀遂舉火闔室自焚死

和沛縣北兵入東門指揮王顯迎降  
伯瑋冠帶升堂南拜慟哭曰臣能報國乃自經死

陳性善山陰人北兵起性善爲副都御史監李景隆軍建  
文四年三月辛巳戰靈壁敗績與彭與民劉伯完王資  
皆被執 成祖縱之歸性善躍馬入河死後加追戮

王良吉水人翰林修撰初聞北兵起輒憂不食日羸憊及  
渡淮閉門涕泣不已訣妻子曰吾不可復生豈能復顧  
汝等服毒死建文君哀其忠遣禮部侍中黃觀 諭祭  
鄒瑾永豐人任大理寺丞北兵至徐增壽約開門降瑾與  
魏冕等廷毆之幾死靖難後自殺 詔夷其族

魏冕永豐人建文時爲監察御史北兵至金川門徐增壽  
約開門降冕與大理丞鄒瑾率同僚十八人卽殿前毆  
之幾死會輟朝冕及瑾大呼請速加誅臣等義不與此  
賊同生不聽明日 宮中火起或謂冕宜急迎附冕毅  
色厲聲曰使吾改臣節徒自壞也靖難後冕與瑾自殺

續文獻通考 卷之六十一  
法官請追罪 詔夷晁族

曾鳳韶廬陵人建文初爲監察御史會 藩王來朝馳  
皇道入且不拜鳳韶侍班言 殿上宜展君臣之禮  
宮中乃敘叔姪之倫由 皇道不拜大不敬建文君曰  
至親勿問北兵逼議遺書於燕使罷兵息民無敢行者  
鳳韶慷慨請行姚廣孝勸却其書不報靖難後 召復  
御史不至尋加吏部侍郎 召又不至刺血書憤詞襟  
上曰予生廬陵忠節之邦素負剛鯁之強讀書而登進  
士第仕宦而至繡衣郎旣一死之得宜可以含笑于地  
下而不愧吾文天祥屬妻李及子公望曰我死勿易衣  
遂自殺李亦自經死

龔太義烏人都給事中 成祖渡江太與妻傅訣曰事至  
此我自分死爾第攜幼穉歸否則俱溺井無辱也俄宮  
中火起太馳赴爲兵校所執見 成祖金川門以非奸  
籍得釋太自投城死 成祖大怒立 命軍卒劉其屍  
黃鉞常熟人建文中授刑科給事中改禮科父喪將歸方  
孝孺問曰北兵日南蘇常鎮京師左輔君吳人 朝廷  
近臣宜有以教我鉞曰蘇州知府姚善忠義激烈能當  
一箇孝孺因附書于善期戮力王室善得書與鉞相對  
慟哭以死自誓北兵至江上善受建文君詔總蘇松常  
鎮嘉興五郡兵勤王以書招鉞鉞卽日營塋事竣遂至  
善所靖難後 詔捕善急善麾下許百戶素權詐得親

善縛善邀賞鉞聞善死慟哭起登琴川橋西向再拜祭  
善畢給家人歸祭具自投琴川橋下而死

何申為中書舍書其妻使四川至峽口聞金川門不守  
發憤慟哭吐血不數日疽發背死

程本立江西按察副使聞北兵入金川門自縊死

王省吉水人浮梁教諭母喪復除睢陽八年又改濟陽北  
兵至省為游兵所執從容引譬詞義慷慨衆舍省省歸  
坐明倫堂伐鼓聚諸生謂曰若等知此堂何為名明倫  
今勿多論且說君臣之義何如省大哭諸生亦哭遂以  
頭觸柱死

劉璟基之子為谷府長史并提調 肅遼慶寧燕趙 六

王府事璟嘗至燕與 成祖對奕 成祖曰卿獨不少

讓我耶璟正色曰可讓處璟不敢不讓不可讓處璟不  
敢讓也北兵起璟馳還家獻十六策不聽還家養疾建  
文君遜位璟稱疾不起法官 誦璟逃叛逮至京見 上  
猶稱殿下 詔獄辯髮自經死

樓璉金華人翰林侍讀北兵入京 命方孝孺草詔不從

改命璉惶懼應命歸自經死

楊本建文中精於道法授錦衣鎮撫持一鐵棒重三十斤  
禦敵皆披靡每帥孤軍獨出被擒繫北平獄 文皇攻  
濟南失利奔還北平恐人心動搖索本誅之

毛太建文元年代王謙為吏部左侍郎靖難兵起數上封

事條陳方畧後尚書張統死太亦死

郭任廉慎有吏才建文中仕至戶部侍郎調兵食軍興不  
乏靖難兵入金川門任不屈死之

陳植廬江人建文中兵部侍郎靖難兵至植受命督師江  
上有督將密議降者植數以大義督將恨之遂遇害

李堅尚 太祖第七女嘗奉 命賑貸北平素負才勇從

長興北進遇北兵戰互有勝負封灤城侯後戰滹沱河  
薛祿引禦中堅墜馬擒見 成祖械繫送北平道卒

平安一名保兒洪武末為山東都指揮靖難師圍濟南安  
同鐵鉉為城守計圍解率兵追至東昌大戰禦幾及

文廟馬踏而止 文廟嘉其忠勇不之罪轉大寧都司

京師既定乃自經死

蔡運南康人建文中歷四川叅政清諒不諧於俗罷歸復

起賓州知州有惠政靖難後論死百姓憐而思之

鄭恕清介不妄取建文中擢蕭縣知縣靖難兵破城恕死  
之籍其家二女亦死之子濂湜姪溫汲謫北平種田

徐讓建文中山西布政司理問有口辯應募賫書物至北  
平議和受而不答建文四年赴軍前差遣戰沒

衛健建文中山西孝義縣丞膽智過人與徐讓同應募使  
北平不答健曰願殿下熟思之亦不答還與徐讓並赴

軍前差遣戰沒

俞道淵淵以父兄功充叅將有功封越雋侯建文元年召

見 上壯之曰老將也從大將軍禦北兵敢戰有功白  
溝河之役淵歿于陣

梅殷汝南侯梅思祖從子尚寧國大長公主靖難兵起殷  
克總兵官守淮安 文皇假道殷絕之 文皇乃渡泗  
水出六合至京師即位殷尚擁兵淮上 上迫公主招  
殷殷得公主書慟哭詢建文君所在中使曰去矣殷曰  
君存與存君亡與亡吾姑忍俟之乃還京見 上 上  
曰駙馬勞苦殷曰勞而無功永樂三年冬入朝殷讐家  
都督譚深等命人擠殷笮橋下死

盧振靖難兵起與徐輝祖齊黃謀畫攻守效力爲多靖難  
兵畏之壬午秋逮至不屈榜振名數其罪殺之夷其族  
劉政長 有經學以舉人爲沛學教諭建文元年奉  
試圻府士千五百人題命論語托孤寄命節不可奪章  
得政卷喜曰此鳥中孤鳳當虛左處子建文遜位殺孝  
孺政慟哭不食死之

張統富平人雲南叅政三十一年召爲吏部尚書靖難後  
成祖命統輔導統出遂自經吏部後堂

馬宣建文中爲北平都指揮使靖難兵起殺張昺謝貴宣  
巷戰不勝走薊州起兵再戰被執死之

朱鑑建文中以都指揮守大寧城靖難兵至大寧力戰不  
支被執死之

卜萬謀勇自負建文中爲大寧守將 文皇忌之以間書

今黨與自歿敗之下獄死

瞿能建文中爲都指揮驍勇有名後從李景隆戰白溝河能父子力戰死之

宋 鄭衣衛指揮使建文元年三月 勅忠以都指揮總

兵靖難兵至忠以兵三萬至居庸大戰以死

建文中爲都指揮與謝貴密謀不遂貴死瑱走居庸且戰且守援兵不至被執遂死

孫泰以都指揮從宋忠戰懷來頗有斬獲靖難兵擇善射者射泰中矢猶力戰大呼陷陣死之

唐子清建文中爲沛縣主簿與顏知縣守沛專調兵食靖難兵至被執不屈死之

鄭華洪武間進士謫東平吏目靖難兵起與妻訣別殉國率吏民憑城自守力不支援兵不至不食而死

黃謙建文中以儒生爲沛典史果敢能戰同顏知縣守城靖難兵至被執不屈死

陳迪宣城人通經術有志操任雲南布政大著軍績陞尚書疏清刑獄集流民免徭租皆切政體靖難師起被

命督軍餉卽陳論大計及 文皇登祚罵不屈同子鳳山等六人就戮乃熬鳳山鼻令迪食尤肆指斥

牛景先禦靖難兵數有功金川門失守遂死蕭寺中後窮治妻妾發教坊司

儲福無錫人初隸燕山衛卒靖難後調曲靖衛因仰天哭

曰吾雖一介賤卒今遇國難決不爲不義屈不食而死  
松江同知不知何許人勤王詔至遂出榜募義勇入援  
文廟卽位械至京磔于市

劉仲禮字用和上海縣人忠義素持盛有文譽以春秋明  
經辟召至應天遇靖難師入不食七日而死後三世孫  
璵官建寧太守

嘉靖十四年給事中楊傑言建文死節諸臣齊泰鐵鉉  
黃子澄張鉉等忠義凜然宜付史局加官贈謚錄後立  
祠禮官夏言覆建文時誤國悖正君側之惡 成祖所  
討楊傑新進小生未諳大義 上恕其狂原之

永樂死事諸臣

陳文建文四年爲燕大將與南將都督何福戰敗死時指  
揮韓貴亦戰死

張玉建文中爲燕大將靖難兵至東昌與盛庸戰敗死

陳亨建文中爲燕將與平安戰于白溝河被斬

劉儁字子奇江陵人洪武中進士永樂六年爲兵部尚書  
時沐晟帥師與交趾賊簡定戰大安海口敗績儁與都  
督僉事呂毅交趾布政司叅政劉昱皆死之洪熙初贈  
少傅謚節愍

郭驥永樂七年爲給事中齎書使北虜諭令通好爲本雅  
失里所殺

張益安平人永樂中由明經任刑科給事中陞禮科性質



直奏對多稱 旨 上目為響張尋奉使北虜主將失利公為虜所持不屈而死

丘福永樂七年福以淇國公帥師北征本雅失里出塞敗績福及王聰火真王忠李遠皆死之

劉忠永樂十八年三月安遠侯柳升征山東妖賊唐賽兒忠以指揮接戰死之

侯保贊皇人以國子生為交州知府永樂十八年遷交趾右叅政廉恕得民與賊黎利力戰死之時同官馮貴亦戰死

王煥永樂二十年以都指揮守興和阿魯台入寇煥被殺樸全椒尹寇陷廬江入城縱火樸盡殺其妻子朝服坐堂上盜欲降之大罵不屈而死

譚淵清流人洪武中以軍功授燕山護衛副千戶後從靖難戰于真定至夾河馬蹶遂死之永樂中追封崇安侯謚壯節

黃正碭山人為僉都御史忤權貴出為廬州英山縣吏平金山叛寇陞右僉都命討雲南叛夷降服而還至普安為權貴遣賊中傷

印岳楚雄衛千戶洪武末征革石瓦那寨糧絕殺所乘馬以食軍士永樂間征麓川力戰而死

陳錡福安人永樂間領鄉薦拜御史監軍甘肅與虜寇遇奮兵大戰力乏被執大罵死之

陳士淵永樂間為尤溪巡檢討平吳十師之亂後餘黨復突起士淵倡勇力戰于羅會場兵敗死之

王聰蘄水人洪武末以靖難功封武城侯征北虜戰死贈漳國公

陳洽武進人累官吏部侍郎佐英國公討平交趾陞兵書交趾復叛成山侯引兵渡河洽力陳利害弗聽明日與賊遇遂被害贈少保官其子樞為給事中

易先湘陰人永樂初由太學高等選授交趾諒山知府陞按察使宣德初交趾叛攻城先嬰城固守糧盡闔家同死事聞 諭祭贈廣西叅政

徐燾永樂中武岡州判官洞蠻寇亂燾率民兵出戰死之

高士文咸陽人質直剛果善騎射洪武末從平內難出入戰陣累陞前軍都督僉事征交趾多效勞勤取廣源州

與賊力戰而死追封建平伯

王真咸寧人洪武中以功授燕山右護衛百戶從靖難出

可制勝肥河之戰斬獲無算而後隊不繼被圍數匝真氣愈奮斬敵數十人馬上自刃而斃追封金鄉侯

薛崑陝州閿鄉人洪武間累官大理寺卿謫廣西永樂初安南國王為黎季犛所殺其孫陳天平自老撾來歸季犛子蒼表請還君之 上命廣西都督黃中以兵五千

送歸其國中舉崑為輔行至芹站伏發劫天平崑被虜死之

劉昱東昌武城人初任吏科給事中歷陞交趾叅政與尚書劉儁贊黔國公沐晟軍務被圍與儁同死之

史安豐城人永樂初進士授禮部主事時交人再叛用薦舉入交趾總戎柳升戰沒安被執不屈死之

李遠懷遠人沉毅有膽力善騎射從軍靖難累功封安平侯征北虜突陣力戰馬蹶被執罵不絕口而死追封莒國公謚忠壯

吳克忠襲恭順伯洪熙初加侯從征虜寇力戰而歿追封

鄂國公弟克勤為都督與兄同歿于陣  
宣德死事諸臣

陳懷合肥人宣德中以軍功累陞左都督正統中進封平鄉伯征虜没于陣追封侯謚忠毅

何忠郴州人永樂中進士授御史宣德元年以言事出為交趾政平州知州至是黎賊圍鎮城藩鎮以忠有膽畧

使懷奏潛請王師被執諸酋強其從忠大怒罵奪其杯擲中賊面流血盈頤遂遇害事聞勅旌其門賜謚

忠節楊士奇傳云子輔倡義守城城破自經

崔聚宣德元年安遠侯柳升敗死交趾明日崔聚被圍聚固宿將倉卒賊驅象鬪眾亂被執史安陳鏞曰吾輩當見危授命皆死之

劉子輔江西廬陵人初為廣東按察使坐累左遷知交趾諒江府撫民如子民愛戴之時黎賊陷諒江子輔與守

將倡兵民死守食盡城陷城中人皆力鬪以死無一人降者子輔知事不支遂自經死一子一妾皆先子輔死事聞贈子輔叅政賜祭復其家

正統死事諸臣

方政全椒人正統四年春政以都督同鎮守雲南黔國公沐晟率兵討麓川不利政戰死追封威遠伯謚忠毅

陳詔正統十三年七月處州賊葉宗留反詔以都督禦賊戰死

陳榮正統十三年處州賊反榮以副總兵禦賊戰歿

宋瑛爵西寧侯正統十三年七月親征也先瑛及武進伯朱冕全軍覆沒成國公朱勇俱被殺

張輔爵英國公車駕北狩輔及尚書鄭瑩王佐學士曹

鼐張益皆死之

王清廣州人正統十四年七月廣州盜黃蕭養圍廣州清以副總兵都指揮僉事禦敵被殺朝廷加其子世襲

二級

恭順侯吳瑾左都御史寇深天順五年七月擊反賊曹吉祥祥姪曹欽俱被殺死贈瑾梁國公謚忠壯深少保謚莊愍

高曇無錫人由國子生授潭州府通判鄧茂七亂會府使督餉遇賊以刃脅之曇罵曰汝等無狀上勞王師下毒黎庶指日梟首敢殺汝父母邪遂受害

程思溫婺源人正統間進士遷禮部員外巳巳之變死于

難景泰中追贈錄用其子

莊英歙縣人舉鄉貢權廣昌知縣寇入境挺身捍禦遂遇

害贈廣昌通判錄其子爲太學生

耿定和州人官刑部郎中浙江叅議正統末處州盜起定

率兵勦捕死于兵贈按察副使遣官諭祭

張瑛知建寧府以征沙尤功陞叅政掌府事明年盜復猖

獮瑛直抵其巢與弟敬力戰死之

雷潛建安人宣德中領鄉薦除武選司主事陞郎中死于

正統巳巳之變

漆員瓦寧縣人宣德巳酉鄉薦遷禮部郎中死于正統巳

巳之變

張敏正統間爲尤溪主簿沙寇亂犯城敏奮力誓師出與

賊戰因民兵不熟行伍且前後不援力戰死

陳順建寧人正統戊辰沙尤寇亂順集民兵與戰大勝後

賊奄至順衆潰手殲十數人力竭遂遇害時邑人甯宗

珮亦同死之

王用相龍巖人永樂辛丑進士歷官戶部員外正統間歸

省遇沙寇亂被執不屈死之

姚銑侯官人進士官德初給事中正統巳巳之難死于土

木時邑人陳鈍懷安人周傑皆進士俱以扈從死

熊尚初南昌人由吏員任都察院都事經歷正統末知泉

州府鄧茂七犯境尚初曰受命一方寇出不時由我不  
職寧一人受害遂單騎出城中流矢卒後有司錄其死  
事立祠祀焉

崔惠晉江人宣德中領鄉薦任江西石城教諭叛賊陳椿  
陷城惠爲所執賊逼從之惠罵曰豈從汝狗奴反耶會  
燬草菅卽投火焚死

李思鄒晉江人正統沙尤賊亂據黃山脅使從已思鄒叱  
曰我作太平百姓豈從汝作賊耶遂以義倡鄉里四百  
人立柵爲禦屢與賊戰俱勝一日早適天霧暝賊乘  
間攻柵暴奔潰思鄒獨率六七人力戰死之暨殮顏色  
如生

劉祥監利人以左軍都督府都事死正統己巳之變天順  
間錄其子

呂鏞蘄水人領宣德丙午鄉薦任福之清流知縣值流賊  
鄧茂七陷縣鏞拒之力不能支具服端坐中庭抗罵不  
屈賊支解以死邑人立廟祀之

鄧鑑黃陂人任光祿署丞正統己巳從 英廟北征亡于  
屯景泰初錄其子

翟亨平溪衛指揮僉事正統中以麓川功累遷指揮使後  
復征麓川偕其弟戰死 朝廷遣官 諭祭

馬豫臨清人宣德中登進士官大理寺副正統己巳土木  
失利奮不顧身厲聲叱賊遇害 英廟復辟憫其忠贈

寺正錄其子入監

尹昌吉水人宣德癸丑進士官至行人司正巳巳之變扈  
駕北征自刎而死 朝廷官其子

羅如璿廬陵人正統壬戌進士授行人巳巳扈 駕北征  
土木敗績死之景泰間 詔旌異錄其子

楊清正統末爲建昌所千戶闖寇煽亂廣昌告急清統兵  
勦襲瀕行以鳳仙花染足指囑家人曰他日尋吾屍以  
此爲識後與敵戰果死之

鄧顥樂昌人舉進士正統間知廣信永豐縣時闖寇陷境  
顥伏兵大破之賊悉衆至顥力戰遇害民哀之肖像于  
城隍廟祀之贈光祿卿

張益吳縣人永樂中進士授中書舍人累陞翰林侍讀正  
統巳巳沒于王事

王永和崑山人好學能文器識宏雅永樂中領鄉薦獲主  
師席生徒多所造就宣德中陞兵科給事中歷工部右  
侍郎正統巳巳沒于王事

景泰死事諸臣

陶成景泰元年五月處州賊陶得二寇武義成爲浙江按  
察副使戰死

毛吉餘姚人景泰中進士歷廣東僉事劇賊楊輝攻掠郡  
邑吉督死士破之陞副使賊衆遁于陽江我師徂勝突  
入失利吉死之贈按察使

楊海清城步人景泰八年洞苗肆掠邵湘海清率其妻及

其徒追戰于龍王橋後援不至與妻徒俱遇害

劉實安福人宣德五年進士改庶吉士未嘗投足權門爲  
金華同知擢順天治中景泰中召修元史擢南雄知府  
商稅毫不染指因忤中貴驛奏公抗 勅使詔逮下獄  
不數日竟卒人皆冤之

王廷桂宜章人領天順壬午鄉薦授贛州府同知巨寇流  
劫州縣廷桂率鄉兵禦之援兵不至死于難事聞贈官

錄子

成化死事諸臣

卜馬祥岳州人成化中任指揮同知流賊掠洞庭祥奮身

督戰死之

馬鉉永新人成化中進士授工部主事陞廣西叅議會古  
田苗賊猖獗自將往勦出其不意斬獲過半班師歸爲  
伏兵夾戰竟死之 諭祭贈叅政錄子

正德死事諸臣

楊源豐城人御史楊瑄子弘治中官欽天監候正德元年  
奏占候得大角及心宿中星搖動天璇天機天權星不  
明因勸 上安居深宮絕遊戲至是復奏連日霾霧交  
作爲陰冒于陽臣欺于君小人擅權之象劉瑾怒矯  
旨廷杖已復奏正德二年以來火星入太微垣帝座之  
前或東或西往來不一意在劉瑾瑾召源面叱之曰你



是何等官也要做忠臣復廷杖充軍肅州行至懷慶傷重而死妻度氏斬盧荻覆尸葬于驛後

郁采正德六年流賊趙風子破裕州采為同知死之贈光祿寺少卿廕其一子時有上蔡縣知縣霍恩城破不屈而死真定知縣王佐棗強知縣段豸與賊戰死 朝廷憫之咸贈官 賜廕

馮禎正德七年流賊攻河南禎總兵戰歿

陳乾正德十年四月兀良哈寇馬蘭谷乾為叅將戰死

芮寧正德十一年九月土魯番入犯寧為肅州遊擊將軍

禦之敗沒

兵部員外郎正德十四年四月伏 闕諫南巡震

及行人司副余廷瓚劉校評事林公黼照磨劉珏行人

孟陽李紹賢劉平甫李翰臣詹軾俱 廷杖死

孫燧餘姚人樸謹不外飾自刑曹 勅獄刑獄會劉瑾嫉

公連坐贖罰正德末年江西宸濠密謀漸彰當事者擇

公巡撫其地及謀惡大著公屢疏罪狀以聞俱為中道

遮匿弗能達乃與御史范輅叅議陳洪謨副使許逵死

之謚忠烈

許逵固始人初為樂陵令以靖寇功陞僉事尋轉江西副

使時寧藩起叛兵縛巡撫孫忠烈將殺之一時官屬駭

愕不敢言獨公反覆辯論且厲聲大罵慷慨激烈并命

縛斬於惠民門外刑時公顧孫忠烈云早聽我言當不

至此公蓋嘗有先發後聞之計為忠烈所阻贈左副都御史謚忠節祀旌忠祠

馬思聰莆田人弘治乙丑進士以戶部主事督糧江西因謝宸濠宴語家人曰我倘不歸將 勅藏于高處人皆不論其意已而濠果怒其不從遂遇害後配享豫章旌忠祠

何孟循名遵吳江人正德中為工部主事申官江彬導

上南巡孟循與同官林大輅蔣山卿上疏請罷 巡幸

勿為左右奸豪蒙蔽彬大怒下孟循等于獄尋被 旨

荷校暴午門外五日杖五十罷遣彬看視孟循體故羸

又憤所言不達瘡潰骨糜越二日死嘉靖初贈光祿少

卿廕一子

黃宏六合人弘治進士累官江西叅議時宸濠不軌殺都

御史孫燧及副使許逵以脅迫諸司宏不服以手械向

柱感項而死濠誅贈宏太常少卿祀旌忠祠

吳璟南陵人舉進士官四川僉事流賊鄔藍之黨突入川

東進逼江津璟受檄守之兵援後期城陷被執而死贈

副使官其子鎬為宣州衛百戶

萬琛宣城人為清江令改瑞金流賊夜遁入城或勸避琛

曰當手刃諸賊以報 國恩賊擁入縣遂遇害贈光祿

少卿官其子麟為侍讀

喻江柳州百戶正德間崗寇大作江分營宜章之章橋遇

敵死之

吳勛辰州衛指揮正德間督兵征流賊行至德安應山與賊遇奮勇前驅冒矢陣亡事聞 諭祭加子官

胡節零陵人由行人授御史巡城山東振肅風紀適逆瑾擅權怒節守正捕下錦衣獄捶死嘉靖改元 賜祭贈光祿少卿

鄧旻靖州衛指揮正德間賊逼州境旻與遇于雙魚嶺大戰力盡死之

曹鵬靖州衛指揮正德中流賊劉六等破應山縣鵬督戰力竭死之

宏以方黔陽人進士歷知瑞州府逆濠中之繫獄濠反械赴彭蠡不屈且憤罵為濠所殺嘉靖初贈官錄子

丁泉行都指揮僉事上杭寇發泉擣其巢穴破石馬岐等三寨與賊遇力戰而死邑人祠祀之

曾璉江陵人正德初以吏員任四川綿州判官流寇廖麻子攻劫州縣璉率兵禦敵力屈死之事聞贈上林苑監丞廕子

鄧進石首人正德初以吏員任四川榮山縣典史鄢賊猖獗城陷與子俱死事聞廕子

麥成正德中任安鄉縣典史流賊掠禹江口成父子集民兵禦之比戰馬躡賊叢槊刺之猶徒步手刃數人遂遇害子亦死之

周憲安陸州人弘治癸丑進士歷刑部員外郎上疏言事  
調交州通判復職晉郎中正德七年擢大理知府轉江  
西按察副使征華林寨寇策馬先驅援兵不至死之  
賜葬祭子幹亦死于難 詔旌曰孝烈祀旌忠祠

王鼎正德初知永城縣時流賊攻城鼎率衆守禦及城陷  
鼎取印綬繫于身瞑目端坐以待賊入被執不屈死之  
贈官及子

安宣正德中授夏邑縣丞時流賊楊虎等擁衆逼城宣尚  
未至任聞之兼程而進或止之宣以義辭遂入城分守  
及城破死之錄其子

董綸歸德府經歷時逆賊師尚詔潛伏于柘城塘中招集  
亡叛日夕剽掠陷府城爲賊所執不屈且罵不置口賊  
怒殺之妻賈氏與子奎皆遇害贈官建祠

熊驂正德間萊蕪知縣值流賊侵境驂率民衆出戰爲賊  
所執與主簿韓塘俱不屈死之

陳韜正德間爲登州招遠縣丞值流賊攻掠韜率衆死守  
城陷被執不屈死之事聞贈登州府通判

王禎吉水人夔州府通判荆襄劇賊石和尚反禎領民壯  
與戰大敗之越三日賊大集禎曰今日當以死報國復  
領兵壯衝鋒殊死戰援兵不至遂爲賊所獲禎奮罵不  
已賊殺之 詔贈夔州府同知錄其子

袁珪正德初任高安主簿善騎射時建昌徐賊聚亂珪承

檄統兵分勦以衆寡不敵死于陣贈知縣從祀節愍祠  
梁奎正德間通判袁州姚源洞賊猖獗奎領兵勦捕奮勇  
力戰歿于陣

王天與正德間寧都知縣逆濠之變率師勤王死于難士  
人塑像祀學宮

王業高以父廕授吉安所副千戶扈蹕從征陞正千戶正  
統己巳調征浙寇于丁公崖遇敵死戰援孤勢窮猶手  
刃數人而死其孫莊剛果有謀營平湯存文于萬安殲  
金耀于永豐擒周天鑾于梅花洞正德庚午從征桃源  
拔所佩刀指天畫地誓不與賊俱生領兵至鼓樓舖斬  
獲甚衆進屯梁山師失利指揮徐麟等下馬先遁莊直

前死戰賊勢將却援兵不至力殫死之專闡官其孫爲  
指揮

王祐正德中知廣昌縣廣寇至民皆逃散勢絕援孤乃引  
刀自剖其腹曰有城郭不能死守何以生爲左右驚奪  
其刀後以援至寇稍退越七日復突入祐倉皇赴敵遂  
死之

鄧俊正德間建昌所千戶桃源盜熾俊奮欲自效戰數合  
皆利盜陰識之百弩相攻俊馬陷淖泥中盜磔殺之當  
道上其事優給其子

紀鏞由吏員授福建漳浦縣丞正德丁丑南靖寇熾鏞率  
兵與戰斬首數千級棄勝抵其穴因遇害事聞贈官錄

子

王廷翰彭澤人正德己卯宸濠作亂遊兵掠境翰挾弓矢率其子弟鄉兵追敵賊有畏心遂擲金于地誘之翰不視奮擊愈厲連射斃二賊對敵終日矢盡力竭身中十餘鎗罵賊不絕口賊乃斷其頭而去

羅明南昌人由吏員授衛知事歷四川劍州判官正德中劇盜鄆藍等數萬人攻城民竄明偕其子介死守孤城不支明被執罵賊就死介奮身救父亦被殺事聞蒙恩卹廕

李俊饒州守禦正千戶正德庚午桃源盜據險為亂官兵獨奮身直前手刃賊十餘力屈受執罵不絕口其弟李二遠馳蓋力助兄遂同遇害副千戶高鈺百戶鄭鑑同

死

節義考

忠臣六

忠隱

唐天恩常熟人舉鄉貢知葉縣劇賊劉六劉七擁眾壓境天恩奮戰生擒百餘人戮之既而援兵不至城破被執一門死者六七人贈光祿少卿廕其子

李情江西按察司副使整飭饒州兵備時桃源降賊復攻萬年縣有告賊至請去情曰我憲臣柄兵者寧死不去遂遇害同死事者通判秦碧陳遠照磨馬驄指揮邢世臣千戶許政等

續文獻通考卷之六十六終

天恩奮輝主帥百餘人懸之項而對其不至其如斯辭  
善天恩常照人舉職貢賦葉糾陳相隱六隱于其眾烈烈

二意相蓋文相民同豈害隔于兵高孫百只漢證同

當有良直前手取類十餘文受據誰不歸口其亦李

續文獻通考卷之六十七

皇明進士雲間王圻纂輯

節義考 忠臣六十忠隱

嘉靖死事諸臣

賀冕邵陽縣人嘉靖十年流賊劫掠冕率弟璋并姪四人  
奮勇拒敵以後援不繼死之

魏祥榆林參將嘉靖十四年虜吉囊入榆林古北口祥出  
兵禦敵力戰而死 詔旌其忠

劉世忠山西西路參將嘉靖二十一年套虜板不孩小王  
子不及兒台吉與掩荅衆酋叛人高懷智等入大同塞  
破鴈門掠太原而南及潞州平陽諸郡世忠誓將躡虜

力戰應援不至虜集精騎三千圍之世忠裹創步戰虜  
衆亦窘會金矢火藥俱罄虜盡銳攻之世忠中二矢死  
事聞 贈官謚忠愍立祠祀之

王恭大同指揮嘉靖三十一年北虜以市薄入寇大同諸  
將觀望或有陰結鬻路者獨恭禦戰死之 代府饒陽

王以聞 贈官廕子有加

郭都大同總兵嘉靖三十二年北虜入寇都出戰死之事  
聞優卹

劉梅延綏副總兵嘉靖三十二年北虜入寇梅出戰死之  
優卹如例

李冰山西總兵嘉靖二十二年北虜犯山西趙時春  
敗績冰力戰而死

王鈇嘉靖三十四年爲常熟知縣率民禦倭力竭而死事  
聞 贈卹

黃釗爲温州同知嘉靖三十五年倭寇温州逆戰而死事  
聞 贈官廕子

奚世亮黃岡人嘉靖丁未進士授主事知延平府倭夷寇  
閩世亮與武帥分城拒守城陷亮猶西向迎戰身被數  
鎗死之事聞 贈官錄子

錢錞顯陵衛人嘉靖庚戌進士知江陰縣倭夷寇亂錞與  
戰死之 贈光祿少卿廕一子

朱裒鄖西人嘉靖丁酉領鄉薦知揚州府值倭亂裒率兵



征之力戰死于陣事聞 贈叅議廕其子

陳聞詩柘城人舉嘉靖鄉試以親老不仕及親沒哀毀骨立癸丑秋賊苗詔亂被執不屈乃絕飲食誓以必死後三日得自經追 封鳳陽府同知

許勇衛百戶嘉靖末征倭至泗州力戰而死 詔世襲千戶

萬曆死事諸臣

梁琦寧夏遊擊萬曆十九年禮部覆奏琦死難宜建祠致祭從之

馬承先寧夏守備萬曆十九年禮部覆奏承先死難宜立祠致祭從之

陳緒等寧夏常信堡百戶萬曆十九年禮部奏逆賊煽虐全堡遭屠緒等死難宜建祠致祭從之

李如松遼東總兵官萬曆二十六年出塞殺虜陣亡 贈少保寧遠伯應襲兒男准授勲衛照本職例俸加陞三級仍廕一子本衛指揮使世襲還 賜謚立祠加祭營

忠隱

春秋 夙沙矜鼓子之臣晉荀吳率師襲鼓滅之夙沙矜以其孥行軍吏執之辭曰我君是事非事主也名曰君臣豈曰主臣今君實遷臣何賴于鼓穆子召之曰鼓有君矣爾心事君吾定而祿爵對曰臣委質于狄之鼓未

委質于晉之鼓也臣聞之委質爲臣無有二心委質而策死古之法也穆子嘆曰吾何德之務而有是臣也聽使行

漢

梅福壽春人成帝時爲南昌尉上書諫不宜專任外戚不聽王莽將篡位遂棄官變姓名爲吳市門卒

陳咸沛國人以律令爲尚書見王莽篡位何武鮑宣皆死曰吾可逝矣即乞骸骨三子參豐欽悉令解官閉門不出入猶用漢家祖臘曰我先人豈知王氏臘乎時喻糜郭欽爲南郡太守杜陵蔣詡爲交州刺史皆稱病歸卧母將隆東海蘭陵人成帝朝爲諫大夫上封事遷冀州牧累官至京兆尹王莽秉政隆不附免官徙合浦

胡剛華容人平帝時大司徒減宮辟之值王莽攝政剛解其衣冠縣府門而去遂亡命入交趾隱于屠肆之間莽敗乃歸鄉里

蔡勲陳留圉人平帝時爲郡令王莽遣人授厭戎連帥勲對印綬仰天嘆曰吾策名漢室死歸其正昔曾子不受季孫之賜况可事二姓哉遂携家屬逃入深山

管寧字幼安朱虛人漢末避亂依公孫度後浮海還郡曹魏時華歆屢請以位讓之固辭不起卒年八十四

魏 范粲爲太宰從事中郎魏主芳廢素服拜送哀動左右遂稱疾佯狂不言寢所乘車足不履地者三十六年

續文獻通考 卷之六十一  
孫和薦其操行詔郡縣給醫藥歲以二千石祿養病又加賜帛百匹子以父病篤俱不受年八十四卒于所乘之車

晉

郭琦陽曲人趙王倫篡位欲用琦琦曰我已爲武帝吏豈容復爲今世終身隱居

辛勉狄道人博學有貞固之操仕爲侍中及洛陽陷劉聰欲署爲光祿大夫固曰大丈夫豈虧高節事二姓乎聰爲築室于平陽西山月致酒米辭不受

辛恭靖狄道人爲河南太守姚興來寇恭靖固守百餘日援兵不至城陷被執恭靖厲色曰我寧爲國死不爲羗

臣與幽之別室後走歸江東

陶潛長沙人自以晉世宰輔耻復屈身後代宋武帝王業漸隆不復肯仕所著文章皆題其年月義熙以前明書晉氏年號自永初以來惟書甲子而已

唐

甄濟有操行安祿山爲採訪使奏堂書記濟察祿山有異志詐得風疾昇歸家祿山反使人封丹召之濟引首待刃蔡希德以實病白得免後慶緒亦使強昇至洛陽會官軍平東京濟詣軍門上謁廣平王俶遣詣京師上命館于三司令受賤爵者列拜以愧其心蘇源明亦稱疾不受祿山官後以濟爲秘書郎源明知制誥

孫邨奉化人唐末爲左拾遺朱溫篡唐著春秋無賢人論  
上世論即脫冠裳服布衣以隱著書記年悉用甲子以  
示不臣之義

梁震蜀依政人唐末進士也唐亡歸蜀過江陵高季昌愛  
其才識欲奏留爲判官震耻之欲去恐及禍乃曰震素  
不慕榮宦明公必欲使參謀議但以白衣侍樽俎可也  
季昌許之震終身止稱前進士不受高氏辟署

劉昌嗣湘鄉人漢時爲磁湘二州刺史隱帝遇害昌嗣憤  
之即避地衡山馬氏招以賓禮不赴周行逢逼以僞祿  
昌嗣曰吾嘗致身漢氏縱不能爲夷齊獨不可效梅福  
乎乃改姓氏號愚叟躬耕醴粥以終身焉

宋

孫逢眉山人靖康時爲太學博士張邦昌僭位獨不入賀  
祠部貢外郎喻汝礪亦捫膝曰不能爲賊臣屈遂掛冠  
去

譚世勣長沙人仕爲禮部尚書張邦昌僭位使權直學士  
世勣稱疾不起後贈延康殿學士

趙俊字德進南京宋城人官至朝奉郎隱居杜門劉豫僭  
號欲官之辭疾不就凡家書文字但書甲子卒贈承信  
郎

徐端益虹縣尉也張邦昌僞詔至縣令以下迎拜如常式  
端益獨不拜而走

史次秦眉山人爲軍教授吳曦招之僞以桐油塗兩目末  
生附子付之比至目盡腫其母又僞以訃音報曦乃聽  
還後官至合州太守

潘汝一海陵人淹貫經史善文章建炎中許容攝州事迎  
虜汝一不食數日所親強之乃起虜遣人誘之罵曰吾  
生于宋死于宋得爲忠義鬼含笑入地矣後以進士名  
次得官歷徧州縣

殷澄華亭人元兵入華亭澄避地南錢後伯顏授華亭軍  
民都統管使守其地澄即棄去野服隱居浦上放浪九  
峰三泖間

許月卿婺源人宋亡不言雖言亦如病狂卒年七十

謝疊山嘗書其門曰要知今日謝枋得便是當年許月  
卿

吳欽休寧人中漕舉補府學教授宋亡不仕題其所居之  
屏曰殷周雖代而首陽自存晉宋雖更而陶徑自若

周焱吉水人寶祐進士官南昌知縣元有天下誓不復仕  
邵桂淳安人咸淳進士授處州教授國亡不仕

胡仲霖高安人元革宋命耻食其祿與子希俱隱遁終身  
游汶德清人咸淳中歷江西江東福建提刑俱有能聲宋

亡隱居元叅政蒲大全薦爲福建路總管固辭不就嘗  
大書衣背云前宋提刑今爲百姓服之以出入焉

馬端臨廷鸞仲子以廕補承事郎明年宋亡隱居不仕

王序字景禮晉江人少與兄庚齊名相繼擢咸淳進士知長泰縣攝守惠州宋亡徜徉丘壑以終身焉

吳應柴休寧人年十六舉鄉貢入太學因宋革命不仕

陳存湖州人累官至殿中侍御史宋亡元遣使七徵不起遂却醫絕粟旬有四日卒

黃森字水心甌寧人父駟宋季爲吏部郎中森景定間預鄉薦國亡不仕隱于天湖山自媿弗能如夷齊之餓死

蔣粹翁政和人宋末爲太學生國亡隱于滿月山危復之臨川人宋末貢補太學國亡隱居不仕

李士華撫州之崇仁人宋亡爲元更易方笠窄袖衫公獨深衣幅巾翱翔自如人競以爲迂公曰我故國之人義

當然耳

劉揚祖字弘宗慈谿人景定三年進士爲刑部員外郎見賈似道執政國事日蹙遂有肥遯山林之志逾年而宋亡改冠裳慟哭及元下詔求賢揚祖不忍聞遂徙家雲湖寺山之東原更求其西茅山建介白樓自號介白散人以示不臣于元

應本仁字本立鄞人由曾大父伯謙而上逮文敏公繇世顯于宋本仁以家世爲宋臣義不仕元隱居城南以終陳應麟字天祺鄞人以通儒稱至元間安車徵之謂使者曰吾祖宗世爲宋臣子孫不忍食異姓祿固辭不起賜號純德先生

汪懋卿與弟森卿奉化黃甘里人也宋末同學同貢宋亡後並隱居不仕杜門著書其子灝字季夷瀚字幼海受家學治春秋亦躬耕孝養薦辟不就

姚獬孫字應獬慈谿人宋末舉鄉薦補國子助教改學錄及元混一不屑于仕退隱雙峰別墅

王昌世鄞人應麟子也自以先世仕宋隱居不仕惟蒐輯遺書露抄雪纂而已

袁士元鄞縣人父鏞咸淳進士尚氣節元兵至鏞往軍前責以大義遂遇害後士元薦爲翰林國史檢閱官不就胡餘學不知何許人宋亡不仕作媒發問荅見意曰媒問發汝何傷汝爲國秀時辛苦事蚕桑中年得夫婿懂懂

拜姑嫜肅容采蘋藻洗手供茶湯良人正年少相期家道昌良緣天所妬夫婿遽云亡自從夫婿亡十年守空房皓月照枕衾暴雨頽垣墻獨寤誰呼喚獨語誰交相發來吾語汝琴瑟貴更張汝篋既單薄汝門復妻涼死者不復起生者宜自詳鄰有美丈夫顛顛更昂昂牛羊量用谷金玉堆滿堂門下繫珠履庭前拂笙簧出則專城居入則侍明光吾慕昔蹇修與汝解珮纓以此窈窕婦配彼英俊郎花樹戲蛺蝶蓮浦浴鴛鴦世無百歲人倏忽如風狂莫將泡影身徒置冰灰場敗基須換局作戲且逢場有髮可重結有耳何自戕鬼妻變人婦毋作老死孀 發荅媒妾自怜妾家貧如洗妾貌粧不妍中

年方擇配幸逢夫婚賢藍橋疑仙會紅葉開良緣俯以  
奉箕箒仰以供豆籩粵從定六禮穩圖偕百年渠宜室  
家願倏遭中道捐空亡照明月幽壙凄寒煙舉案昔華  
屋埋玉今荒阡恨不即同穴何忍續斷絃妾頗親筆硯  
亦嘗閱簡編女不踐二庭婦不再移天或刑耳自誓或  
斷髮自全或削鼻偃蹇或毀面迤邐卓卓節操立表表  
風孤騫藐茲未亡人有意奉周全媒言頗喋喋媒意毋  
拳拳之死矢靡他斯言當真詮寧貧受勞碌寧賤受磨  
研寧凍如寒蠅寧餓如饑鳶終不以快樂而易此憂煎  
井底水不波山頭石不遷再拜謝媒妁歸來雙淚漣十  
襲破鏡他年會黃泉

張山翁字君壽普州人德佑初爲荆湖宣撫使將官鄂守  
張晏然納款山翁以書請讓已而被執軍前諭曰若降  
不失作顯官山翁酬對不屈然義而不殺後居黃鵠山  
聚徒教授而終

黃申字酉卿井研人爲安樂丞元兵至令欲申同降申抗  
不往吏民數百人強輿致之申顛踣于地若中風然令  
無如之何至暮衆昇入寘中堂或食以粥得免隱巴山  
以終

曹應符華亭人少謹身飭行爲鄉里推重景定中進士授  
迪功郎會宋亡遂隱不仕族人光遠中進士辟軍器監  
管宋亡衣冠不改人稱爲大頭巾相公云



陸震龍華亭人咸淳鄉貢進士宋亡即棲隱講授終其身  
衣冠不易嘗自贊畫像其略曰勤勤劬劬耽嗜慕悅而  
不舍者聖賢之書趙趙起起畏懦退縮而不敢廁者世  
利之途或者見之而指笑此必抱遺經行古道之拘儒  
謝國光華亭人咸淳中鄉貢宋亡遂不仕元治書侍御史  
程鉅夫奉詔搜賢以國光薦輒杜門稱疾

金

張天綱霸州益津人哀宗時權參知政事國亡為宋械至  
臨安有司令供狀迫書虜主天綱曰殺即殺焉用狀為  
止書故主而已後不知所終

元好問秀容人天興中為行尚書左司員外郎金亡不仕

元

吳當江西人嘗為行省叅政陳友諒陷江西遣人辟之卧  
床不起以死自誓乃舁床載之舟送江州拘留終不為

屈

蔡子英永寧人舉進士累顯秩及元軍敗卓騎走關中  
入南山有司以形求之械送京師命釋之授以官  
不受退而上書大畧謂臣之事君猶女之適人一與之  
醮終身不改事君之道一食其祿終身不二朝廷重  
之命館于儀曹忽一夜大哭不止人問故曰思舊主  
耳上知其志不可奪勅有司送之出塞不知所終

皇明

彭與明江西萬安人 國初以貢入太學洪武二十五年  
授兵科給事中陞刑部浙江司員外郎建文已卯陞湖  
廣按察司僉事遷大理寺右寺丞北師起與禮部左侍  
郎陳性善欽天監副劉伯完指 王貴等俱從李景隆  
軍中白溝河戰敗與明等皆被執尋悉縱遣之北師渡  
江與明遁去徧遊四方志欲有為越數年微服來歸翼  
日竟去不復返不知所終

縉字伯紳湖廣武昌人曾祖壽元翰林直學士 國初  
縉以貢入太學試事有廉謹名時戶部奏遣太學諸生  
勘天下錢穀凡幾千輩歸報多失實論坐者十八九縉  
獨無所坐授北平永清縣典史居官廉慎既而攝縣事

境內多盜縉捕治有法一邑晏然是歲旱蝗不為災無  
何 潛邸師興一時守令相率迎降永清地尤密適縉  
極力拒守民多寡弱逃散縉自度無可為佩印南奔欲  
有所為道聞繼母喪還家營葬甫畢亟圖勤王戰艦戎  
器畧具而天命有屬 國事已去縉乃走匿編民間已  
而蹤跡漸露有司見收縉自分必死慷慨就行械送  
闕下 文皇義其志下之獄謫戍興州居數年以其子  
代還屏迹田園年八十而終吳文定公寬為縉傳有曰  
以愧世之為丁公而倖免者嗟夫縉亦所謂不可奪志  
者哉

東湖樵夫未詳何郡人與姓名壬午七月樵夫鬻新臨海

東湖上見里巷傳相語曰新即 位詔至矣樵夫矐視  
父之舍檐奮擲于水而死

石允常字恒德浙江寧海人洪武甲戌進士歷官河南按  
察司僉事廉介有聲人稱石清潭為僉事時嘗微行民  
間聞哭聲甚悲允常廉知其女為闖宦逼奸而死受其  
訴聞於 朝捕宦抵大辟羣宦銜之糾結巧誣左遷常  
州同知俄圯師起允常棄官歸 文皇登極追錄建文  
間廢毀周府官僚事逮至者五十餘人允常與焉眾悉  
洶懼服罪人止贖米五十石 命于原官加一秩仍用  
之獨允常鍛鍊百端堅不服繫獄三年免死謫戍中屯  
衛躬環甲冑幾三十年年七十代還過南畿感愴病卒

舟中遺文曰遇安集

葉希賢浙江松陽人 國初舉賢良擢監察御史建文壬  
午六月之變家人意希賢必死發喪以衣冠歸葬希賢  
實出亡為僧號雪庵溯江而西抵重慶之善慶里隱者  
杜景賢知其非常人於白龍山為寺希賢率其徒居之  
朝夕誦經咒誦聽之易乾卦也景賢婉諷之曰和尚祖  
釋而誦儒將儒行乎希賢悟遂轉誦觀音經因名觀音  
寺焉又好誦楚辭時放舟中流朗誦一葉畢輒投一葉  
于水誦已輒哭哭已又誦終卷乃已性嗜酒日注一壺  
飲客雖樵夫牧豎亦拉入與飲半醜呼兒童和歌暝焉  
而寐希賢形頽而頽落筆成章不事工密而意氣渙發

能愴人見者驚異或曰希賢當建文壬午爲翰林學士  
滅迹以死死之日其徒問曰師即死宜銘師故何許人  
但荅曰松陽而已遺詩若干篇時又有河西傭馮翊翁  
韜光匿采意亦空虛之儔然竟莫可踪跡云

補鍋者不知何許人往來隆安里間帽首挂短衲業補鍋  
而食其力垂老不漏一字價值三數詩老酌酒聯句補  
鍋者立于旁怪其語澀而艱輟然者再請老怒曰汝能  
詩即續吾詩指韻而應諸老驚起延之上坐請賦席上  
獅頭柑不可強之役可過此若病風然卒晦以死人言  
其與雪庵故僚友矢死不相問訊云

程濟陝西朝邑人有方術洪武末以明經舉爲四川岳池

縣學教諭建文間上言某年某月西北兵起以爲非所  
宜言械繫至京入問故將斬之濟叩頭曰陛下幸囚  
臣至期無兵臣死未晚也乃繫濟詔獄已而北師起  
乃出濟命爲軍師護諸將北伐諸將與北師先鋒戰  
於徐州大捷已而李景隆師敗北師乘勝席卷遂至江  
上濟逃去不知所終初徐州之捷碑載戰伐次第及諸  
將姓名濟忽夜往祭碑其測其故及潛邸過徐望碑  
問故大怒顧左右趣椎碑一再擊遽曰止止爲我錄碑  
來於是按碑誅諸將無得脫者濟名正在擊處得免曩  
者之祭蓋禳之也或云建文之出濟始終左右之

高賢寧山東濟陽人建文中爲太學生北師圍濟南不下

潛邸射書城中諭諸守者亟降賢寧作周公輔成王  
論射城外亟請罷兵後賢寧被執 潛邸識之曰此作  
論秀才耶好人也留官之固辭其友紀綱勸受 命賢  
寧曰君學校棄才吾廩食太學義固不可綱爲之言全  
其志而遣之年九十七卒綱故諸生除名故謂棄才云  
王稔字叔豐紳之子積學能文有大父禕風受業方孝孺  
孝孺甚器重之許妻以女孝孺之及于難也稔周旋其  
間又與鄭珣至聚寶門外求孝孺遺骸歸葬不得卒坐  
逮繫 文皇念其祖禕死 國特宥免方欲向用稔以  
疾辭還金華結屋讀書青巖之下將終身焉復購孝孺  
遺文爲緱城集以傳人咸義之稔性至孝初紳痛念父  
歿每食必斥兼味稔一遵遺志子孫相承閱數十年不  
變事母丁如事其父送終盡禮三年酒肉未嘗入口學  
問該博從游者日衆郡邑交重之禮爲鄉飲賓至以分  
獻先聖廟稔踈髯偉貌出必儼然古冠服人爭覩之曰  
此王先生也所著有青巖稿聖廟文纂金華賢達傳續  
文章正宗卒年五十九門人私謚曰孝莊先生  
郭良不知何許人建文末與梁中節俱棄官爲道士云  
梁良用浙江定海人建文中父子兄弟八人同仕于 朝  
壬午之變相率去爲舟工後皆死于水  
梁田玉浙江定海人洪武末仕至郎中建文末與葉御史  
俱髡髮逃神晦跡終其身

梁良王建文中中書舍人田玉族人也靖難後逃入廣之  
南海蓄書爲業以死

宋和不知何許人建文中爲中書舍人與郭節及海州人  
何洲皆棄官變姓名爲巫死異域

文章五宗平年五十五門人益曰孝節夫主

地主去主少祇善丹青巖斷望閣文慕金華習鼓舞  
癩夫聖廟絲起緯對逸出必顯然古寂艱人年賦之曰  
問茲軒翁流春日舉派馬交重之甄爲泚燈實至以介  
變軍母丁時車其父羨爲畫節三平醜肉未嘗人口學  
短發身必孔兼和絲一數畫志于紙財承閣樓十平不

